

宣
統
新
疆
圖
志

新疆圖志卷一百七

名宦

漢

鄭吉會稽人爲人彊執習外國事宜帝時以侍郎田渠犂積穀因發兵攻破車師神爵中匈奴乖亂日逐王欲降漢吉發諸國兵迎之送詣京師於是威震西域遂並護車師以西北道號都護都護之置自吉始中西域立幕府治烏壘城都察烏孫康居等三十六國漢之號令始頒西域矣封安遠侯諡曰繆

陳湯字子公山陽瑕丘人建昭元年爲西域副尉校沉勇有謀喜奇功時匈奴郅支單于殺漢使西遁康居數侵凌烏孫大宛湯與都護甘延壽謀襲擊郅支免爲西患延壽欲奏請之湯謂公卿無遠見請必不從會延壽病湯獨矯制發兵延壽驚起止之不可乃共疏陳兵狀卽日引兵行遂破單于城斬郅支傳首京師封關內侯

段會宗字子松天水上邽人竟甯中爲西域都護諸國敬其威信後徵還歷金城沛郡雁門太守陽朔中西域上書願得會宗因復命爲都護三年受代還屬烏孫屢亂奉命安輯之宣明國威濟以權宜卒定其國賜爵關內侯年七十五病歿烏孫中諸國爲發喪立祠焉計地節至新莽西域都護十八人自漢書立傳外廉褒以誠信稱郭順以廉平著孫建以威重顯亦其次云

班超字仲升扶風人永平中使西域至鄯善與吏士三十六人夜以火攻匈奴使者營斬其使鄯善王廣遂納子爲質至于闐其王廣德意甚疎且信巫言求漢使鷁馬祠神超令巫自來取乃斬巫廣德懼殺匈奴監使以降復執疏勒王兜題更立故王兄子忠爲王西域與漢絕六十五載至是復通章帝立詔徵超還疏勒聞之舉國憂懼恐漢使去國爲龜茲所滅其都尉黎弇至以刀自剄還至于闐王侯以下皆號泣曰依漢使如父母誠不可去互抱超馬足不得行乃止旋擊破尉頭姑墨等國莎車龜

茲亦相繼降永和六年發兵討焉耆危須尉黎斬焉耆王廣尉黎王汎傳首京師於是威鎮西域五十餘國咸納質內屬焉屢遷拜都護封定遠侯

耿恭字伯宗永平十七年爲戊己校尉屯金滿城明年匈奴擊殺車師王安德遂攻恭恭以毒葯傅矢射之中者創皆沸虜震怖謂漢家兵神會大風雨乘勢擊之殺傷甚衆遂解去旣復攻恭於疏勒城城中穿井十五丈不得水恭整衣拜禱水泉湧出虜驚以爲神明引去會車師叛與匈奴共攻恭圍數月食盡煮鎧弩食其筋革與士卒推誠同生死故皆無二心匈奴遣使誘降手擊殺之炙諸城上帝遣將救之擊走匈奴車師復降召恭還拜騎都尉

李恂字叔英安定臨涇人章帝時持節領西域副校尉威惠兼行諸國侍子及督史賈胡數以金馬香麝之屬相饋遺一無所受時匈奴斷西域車師伊吾以西使命不得通恂設伏購賞遂斬

虜帥懸首國門自是道路清平遷武威太守

梁慄字伯威北地戈居人慷慨好功名延平元年爲西域副校尉都護段禧守它乾城慄以城小不可固乃說龜茲王入其城共相保遣將迎禧合軍八九千人龜茲更叛其王慄出戰大破之會詔罷西域都護慄等並還後官度遼將軍

班勇定遠侯超之子元初六年敦煌長史索班將兵屯伊吾爲北匈奴與車師後部所攻沒朝議欲閉玉門關遂棄西域勇上議謂宜復置校尉居敦煌以捍撫西域設長史屯樓蘭以招懷諸國延光二年命勇爲西域長史將五百人屯柳中明年鄯善龜茲溫宿諸國降附因發其兵至車師前王庭擊走匈奴伊蠡王於伊和谷四年發兵擊後部大破之捕得後部王軍就及匈奴持節使者至索班歿處斬之厥後累破匈奴呼衍王遂徙居枯梧河上於是車師無復虜迹矣

耿忠扶風茂陵人也與竇固至天山擊呼衍王斬首千餘復追至

蒲類海取伊吾廬地置宜禾都尉留吏士屯田伊吾廬焉

徐幹平陵人也建初三年上疏願佐超遂以幹爲假司馬將兵就超幹與超擊破番辰斬首千餘級八年拜幹爲軍司馬永元三年以龜茲姑墨皆降乃以幹爲長史關寵爲己校尉屯柳城中明帝永平十八年焉耆龜茲攻沒陳睦車師叛與匈奴共圍耿恭於金蒲城諸患一時並起寵爲匈奴所圍上書求救司徒鮑昱勸帝令敦煌酒泉太守各將精騎二千以赴其急帝然之乃遣征西將軍耿秉屯酒泉遣段彭發張掖酒泉敦煌三郡及鄯善兵七千餘人以救之

耿秉於建武十七年夏與竇固合兵萬四千騎復出白山擊車師車師有後王前王前王卽後王之子也其廷相去五百餘里固以後王道遠山谷深士卒苦寒欲攻前王秉議先赴後王以爲并力根本則前王自服固計未決秉奮身而起曰請前行乃上馬引兵北入衆軍不得已遂進并縱兵抄掠斬首數千級收馬

牛十餘萬頭後王安得震怖從數百騎出迎秉而固司馬蘇安欲全功歸固卽馳謂安得曰漢貴將獨有奉車都尉天子姊婿爵爲通侯

通侯光武女弟固公主明帝時也故安得稱之

當先降之安得乃還更令其諸將迎秉

秉大怒之披甲上馬麾其精騎徑造固壁言曰車師王降訖今不至請往梟其首固大驚曰且止將敗事秉厲聲曰受降如受敵遂馳赴之安得惶恐走出門脫帽抱馬足降遂定車師而還北魏

韓牧以交趾公拜假征西將軍領護西戎校尉太平眞君九年鎮鄯善

六朝

呂光字世明氏人爲符秦將軍率兵討西域龜茲王帛純捍命猶胡王遣將率騎及姑默尉頭等國兵救之光遷營相接陣爲勾鑕之法大破之於城西帛純逃奔王侯降者三十餘國立帛純弟震爲龜茲王以安之光撫甯西域甚著威惠秦命爲安西將

軍西域校尉後還姑臧符堅已敗遂僭立國爲後涼

涼

李寶西涼公嵩孫也涼爲阻渠蒙遜所滅寶奔伊吾魏太平三年率流人及虜騎襲敦煌據之遣使降魏魏以爲鎮西大將軍領護戎校尉沙洲牧敦煌公承制玉門以西寶寬雅有度量著威惠於西土後徙并州刺史卒諡宣公

唐

郭孝恪許州人貞觀十六年拜安西都護西州刺史所治高昌舊都流徙罪人與鎮兵雜處孝恪推誠撫馭軍民悅服西突厥咄陸可汗寇伊州以輕騎二千擊卻之乘勝逐北拔處月俟斤城降處密部會焉耆叛朝命孝恪討之執其王龍突騎支獻京師後以其地爲焉耆都督府

蘇定方顯慶二年爲伊麗道大總管將兵征賀魯至曳婁河虜率十姓兵拒戰定方引勁騎擊之鏖戰三十里斬數萬級賀魯與

數百騎西走定方冒雪急進逼其牙帳縱兵奮擊俘斬又數萬
賀魯走石國於是修亭障通道路定疆界問疾收骸凡爲虜所
掠者悉縱之還命副將蕭嗣業追賀魯獲之以其地置崑崙濛
池二都督府四年賀魯部悉結闕都曼叛連疏勒朱俱波等國
寇邊詔定方爲安撫大使討之縛都曼以獻葱嶺東西悉定

裴行儉字守約聞喜人爲安西都護西域諸國多慕義歸附內遷
吏部侍郎會十姓可汗阿史那都支叛附吐蕃朝廷欲討之行
儉謂可計取乃命行儉冊送波斯王子至西州召豪傑千餘人
自隨揚言暑熱未可進虜遂不設備行儉陰勒部伍倍道急馳
而使人趣召都支倉皇詣營謁遂擒之並執諸部酋長降別帥
李遮旬還拜禮部尙書

王方翼并州祁人爲安西副都護築碎葉城而三門紆還以隱出
沒胡虜競觀莫測方略遷拜庭州刺史十姓阿史那車薄吸叛
圍月弓城方翼引兵敗之於伊麗河斬馘千級三姓咽薊兵十

萬踵至戰於熱海矢着臂引佩刀斷去左右莫知所部雜虜謀內應乃請犒賞召會軍中盡縛殺之遺騎分道擊敵皆驚潰擒其首領三百人西戎震服

唐璿字休璟始平人以儒者號知兵自碣石踰四鎮表綿萬餘里山川要隘皆能言之垂拱中爲安西副都護時韋待價征吐蕃敗績於寅識迦河璿收其潰亡撫安西土疏陳方畧請復四鎮後武后命王孝傑拔龜茲等城自璿倡之官至檢校吏部尙書卒諡忠

郭虔瓘歷城人開元初爲北庭都護金山道副大總管突厥默啜子同俄闐北庭虔瓘飭壘自固同俄單騎馳城下勇士狙道左突斬之虜相率丐降請悉贖同俄死聞已斬舉軍慟哭去以功封潞國公

杜暹濮陽人開元元年以監察御史按事至突騎施虜饋金固辭左右曰君寄身異域不宜逆其情乃受之陰埋幕下旣出境始

移狀會取突厥大驚十二年安西都護闕或三五邇往使安西
虜服其清今猶思慕詔拜黃門侍郎安西副大都護明年于闐
王尉遲眺約突厥諸國叛邇覺其謀發兵誅其支黨更立君長
于闐遂安守邊四年撫戎練士能自勤勵爲夷夏所樂云

張孝嵩及進士第而慷慨好言兵開元中爲安西副都護勸田訓
士府庫充實遷北庭節度使時勃律爲吐蕃所困奪其九城其
王設謹忙求救孝嵩遣疏勒副使張思禮率銳卒倍道往與勃
律夾擊吐蕃盡復所失城

蓋嘉運開元二十七年爲磧西節度使引兵擊突騎施擒其可汗
吐火仙並收得金河公主而還悉取散髮之民數萬以與拔汗
那王威震西陲

高仙芝本高麗人驍勇善騎射累官安西副都護天寶六年小勃
律及旁近二十餘國皆附吐蕃貢獻不入詔仙芝討之仙芝遣
將軍席元慶將千騎前行縛其大臣密諷之曰右曾領洮北第

出詔書呼之賜之綸綵至則縛以待我元慶如言仙芝繼至悉斬之急以兵斷婆夷橋絕吐蕃援兵乃虜小勃律王及吐蕃公主還上以爲安西四鎮節度使

封常清才果無疑事天寶中爲北庭都護持節伊西節度賞罰分明性儉約出軍乘驛私廐纔二馬

郭震字元振魏州貴鄉人以字顯神龍中爲安西都護西突厥酋烏質勒款塞願和而意存叵測元振卽其帳中與計事會大雪元振立不動至夕凍冽烏質勒以老邁數拜伏不勝寒會罷卽斃子娑葛立與其父舊將闕啜忠節相陵侵元振疏請召忠節入宿衛徙部落瓜沙間而宰相宗楚客受忠節金以牛師獎代元振謀召吐蕃擊娑葛娑葛襲忠節擒之殺師獎遂陷安西時元振屯疏勒未發奏乞留定西陲娑葛旋就撫睿宗立召爲太僕卿曾長有掩面哭送者旌節入玉門去涼州八百里居民爭具壺漿歡迎焉

郭昕子儀從子爲四鎮留後吐蕃陷河隴伊西昕帥將士閉境拒守數遣使貢表皆不達建中二年與北庭節度使曹忠遣使自回紇中間道詣闕德宗嘉之賜爵武威郡王

楊何景龍三年爲北庭大都護有德政諸夷心服都護城龍興寺有石碣二紀其功德煥然可觀

元

滿瑪爾德濟謬古埒濟子也將特默齊軍萬人從憲宗伐宋合州攻釣魚山有功還火州卒至元三年太祖命其子和爾齊哈喇德濟嗣爲伊都呼

都勒幹布斯必太祖十二年率兵十二萬圍火州聲言曰阿濟格鄂羅齊諸王以三十萬衆不能抗我而自潰爾敢以孤城當吾鋒呼伊都呼曰吾聞忠臣不事二主吾生以此城爲家死卽以此城爲墓終不能從爾矣受圍凡六閱月乃解帝聞而嘉之重賚以金幣

莽吉蘇世居北庭都護地幼有奇質太祖召至闕下一見大悅曰此兒目中有火他日可大用事世祖於潛邸憲宗崩勸世祖早正大位以安天下眷顧甚隆南征時爲斷事官數命召收豪傑凡引薦皆極其選詔與安國並相固辭帝曰賢哉莽吉蘇求之彼族誠爲罕也卒諡敏惠

巴喇珠畏吾兒人也世居別失八里仕至帥府鎮撫富而樂施或貸不償則焚其券孫托烈海牙觀音努俱官清要而托烈牙尤治績冠時

哈喇亦哈赤北魯聰敏習事國王聞其名自錫哩瑪勒國徵爲斷事官後隨其主巴哩珠阿勒坦歸朝太祖命諸皇子受學焉從帝西征至巴實伯里東獨山

在古城南即松山也
舊設獨山守提于此

見城空無人帝問此何

城對曰獨山城往歲大饑民皆徙他所然地當北來要衝宜耕牧以爲備臣昔在錫哩瑪勒有戶六十願移居此帝乃遣其子伊德實伯納往取之父子留居焉後六年車駕還見田野墾闢

民物繁庶問哈喇亦哈北魯已死矣乃賜其子都督印兼獨山城達魯噶齊

葉懣爾數從征伐有功授廣西道都元帥土番宣慰司素熟夷情相地設屯鎮撫之恩威兼著頑獷胥服遷江西省平章政事屢擒巨盜卒諡敏忠

烏嚕斯哈美祖闕里別幹赤父昔班皆爲顯宦烏嚕斯哈美歷官浙東廣西宣慰使屢平寇亂有政聲

迦魯納答思通天竺教及諸國語西南諸小國二十餘種來朝於帝前啟奏其表諸國驚服朝議討暹國羅斛馬八兒等國迦魯納答思奏此皆最爾國得之無益興兵徒殘民命莫若遣使諭以禍福不服而攻未晚也帝然之遣使往諭降者二十餘國仕至司徒

雅爾堅里至元間以中書省宣使使河南適汴鄭大疫命所在村郭構廬舍備醫藥全活甚衆又承中書檄徵考上都儲峙及還

帝賜錦衣貂裘以旌其能終湖州路達魯噶齊

貝降弱冠從丞相阿珠南伐常登先陷陣司慶元路治中屬歲大饑躬詣行省請賑民賴全活鄉宦范某欲奪民田宅誣以事繫民於獄先後州民被誣死獄中者數人貝降至置范於法州民咸稱快焉遷浙東廉訪令行禁止豪強懾服寮屬有貪穢者悉劾免之終工部尙書諡貞惠

阿爾濟蘇特穆爾爲典平等行省都元帥爲治一遵先政興學養士輕刑薄徭雖同寮不敢私役一民從大軍征高麗有功卒諡武襄

阿台阿爾濟蘇特穆爾子也爲平滌路達魯噶齊請減鹽酒等稅細民不征置甲乙籍以籍民力民甚便之進懷遠大將軍歲饑發粟賑民全活甚衆僚屬始至必餽鹽米牲品曰非他故欲其不剝民耳姻族貧者日有常給民或不能葬則資助之滌爲孤竹舊國乃廟祀夷齊勸風俗焉卒諡忠亮

不忽木字用臣康里部人秉姿英特世祖奇之命給事東宮師事王恂及許衡衡稱爲公輔器嘗書貞觀要政以進帝知其寓諫意又上疏曰臣聞之學記曰君子如欲化民成俗其必由學乎玉不琢不成器人不學不知道故古之王者建國君民教學爲先蓋自堯舜禹湯文武之世莫不有學故其治隆於上俗美於下而爲後世所法降至漢朝亦建學校詔諸生課試補官魏道武起自北方既定中原增置生員三千儒學以興此歷代皆有學校之證也晉武平吳始建國學隋文滅陳俾國子寺不隸太常唐高祖代隋詔州縣並置學校太宗幸國學增學舍千二百間國學太學四門學亦增生員書算以置博士乃至百濟新羅高昌吐番諸國亦遣子弟入學國學之盛至八千餘高宗令國子監領六學各置生徒我朝奄有江嶺之地陛下神功自古所未有非晉隋唐之所敢比也然學校之政尙未全舉臣竊惜之帝覽之喜出爲河北道提刑按察副使後召參議中書省事與

完澤並相

明

李昆字承裕弘治初進士十年以右副都御史巡撫甘肅與總督彭澤經畧哈密兵部尙書劾澤處置失宜詔逮昆下吏法司言昆設謀遏強寇功不可掩瓊不聽謫浙江副使

胡世甯字永清仁和人弘治六年進士累官至四川巡撫代理兵部尙書加太子太保吐魯番貢使乞歸哈密城易降人牙木蘭王瓊上其事世甯言先朝不惜棄大甯交趾何有於哈密况初封忠順至爲我外藩而自慎罕以來三爲吐魯番所執遂押與戎北以疲我中國耗財勞師戎得挾以邀索臣以爲此與國初所封元孛和順甯順安定三王等耳安定在哈密內近在甘肅今存亡不可知我一切不問獨重哈密何也不如謝絕哈密牙木蘭本曲先衛人反正歸順非納降比彼安得索之唐悉怛謀事可鑑也遂留牙木蘭不遣

黃驥全州人洪武中舉于鄉常三使西域仁宗初上疏言西域貢使多商人假托無賴小人投爲從者乘傳役人運貢物至京師賞賚優厚番人慕利貢無虛月致民失業妨農比其使還多齎貨物運車至百輛丁男不足役至婦女所至辱驛官鞭夫隸無敢與較者乞勅陝西行都司惟哈密諸國王遣使入貢者許令來京止正副使得乘驛馬陝人庶少甦至西域所產惟馬切邊需其礪砂梧桐蠟之類皆無益國用請一切勿受則來者自稀浮費益省帝以示呂震且讓之曰驥嘗奉使悉西事卿西人顧不悉西事耶驥言是卽議行

杭雄字世威從彭澤經畧哈密嘉靖三年吐魯番侵甘肅詔雄佩平虜將軍印充總兵官提督軍務

彭澤字濟物蘭州人弘治三年進士歷官遼東巡撫會吐魯番據哈密執忠順王速檀牙郎以其印去甘肅巡撫趙鑑以聞請遣大臣經畧大學士楊廷和等共薦澤澤在兵間久厭之以鄉士

爲辭帝詔慰勉行澤至甘州吐魯番方寇赤斤苦峪諸衛澤以番人可利誘也與趙鑑等謀遣哈密都督寫亦虎仙以銀幣賂之令還哈密城印未得報輒奏事平寫亦虎仙者素黠陰通吐魯番酋爲之耳目據城奪印皆其謀澤初不知而遣之滿速兒以城印來歸留忠順王速檀拜耶如故虎仙復啗使入寇曰肅州可得也滿速兒使其婿馬黑木隨入貢以覘虛實澤已還鑑亦遷去李昆代爲巡撫慮他變質其使於甘州驅虎仙出關滿速怒復歸哈密後復求和遂罷兵

國朝

富甯安姓富察氏滿州鑲藍旗人康熙五十四年以吏部尙書赴肅州經理糧馬奏設哈密巴里坤臺站五十六年以靖遠將軍駐巴里坤親率兵入準噶爾邊境斬俘甚衆進屯烏魯木齊五十九年進兵烏蘭烏蘇破賊所踞山隘獲其台吉遣別將諭降開展城回人進擊吐魯番降其酋長明年收撫吐魯番乞降回

衆還駐巴里坤疏請於布隆吉爾

布隆吉爾在青海西北三百餘里其青海湖與通達等處必由之路

之西駐兵

屯牧設總兵官一名統之以扼黨色爾騰之路又請專遣大臣

領屯田儲糧事宜請以巴里坤牧駝預運軍糧均如議行雍正

元年授武英殿大學士四年冬還朝封一等侯其馭兵紀律甚

賁而有恩在塞外十載降番懷德賊人畏威遠徙卒諡文恭

諡名

那彥成字詔九姓章佳氏滿州正白旗人道光七年冬回疆四城

克復以欽差大臣往籌善後事宜疏陳回疆積弊略言回人素

恭順此次變亂由平日撫馭失宜參贊大臣三年換班其才幹

有爲者三年中辦理未必遽善次者存五日京兆之見不肯認

眞下此竟有視爲利藪專攻搜括者且各長其疆無維制考覈

之分不相顧忌應請分隸考覈俾有所糾察並准一律攜眷久

任其事又悉裁相沿陋規奏請永禁又言伯克補缺每以賄得

而誅求衆回以取償嗣後請先儘有功及家口被難之人次死

事人子孫量材奏補又酌定回目難廢並操兵茶稅各章程請

設喀什噶爾等城銀庫

上嘉許之九年還京旋回直隸總督任諡文毅

先正

璧昌滿洲人道光八年爲葉爾羌辦事大臣請出私墾地畝新糧二萬石改徵折色撥補東四城俸餉又改西抵英吉沙爾之戈壁百四十里置驛開渠商民利焉十年八月逆酋玉素普糾布魯特安集延入寇璧昌聞警盡徙城外商民入城傳集各回伯克諭令傾城助順派兵分防要隘部署甫定賊萬餘由草湖來犯璧昌率回漢兵丁千餘拒戰東門外擒斬六百餘賊退走三百里外我兵僅陣亡六人未幾賊復兩次犯境皆擊走之又遣回兵擊退色呼庫勒之賊十一月朔敗賊聚衆攻城相持兩晝夜圍乃解是役也回漢一心賊終不得逞明年欽差大臣長齡奏移喀什噶爾參贊於葉爾羌璧昌升任焉後官兩廣總督

賜諡

阿桂字廣延姓章佳氏滿洲正白旗人將材相業弁冕一時乾隆二十二年同將軍富德勦逆回霍集占敗賊於阿爾楚爾二十

五年赴伊犁爲辦事大臣伊犁設官自此始時朝命以新疆駐軍事下各軍營大臣籌議皆謂遼遠難駐守獨阿桂上言守邊以駐兵爲先駐兵以軍食爲要伊犁水土沃衍若開墾屯田則兵食可漸充因條陳屯田方略

上諭嘉其勇往任事如所議行續奏新疆東約章程五則皆得旨允行三十年馳赴烏什與將軍明瑞平賴黑木圖拉之亂明年

詔授伊犁將軍晉武英殿大學士三次圖像紫光閣諡文成

先正

倭仁字良峯蒙古旗人生平見過自訟言動無妄咸豐元年抵葉爾羌幫辦大臣任沿途著莎車行記多舉先賢懿行以勸風俗在官實事求是於屯防邊政無不精心講求懷柔民夷尤著信惠後官協辦大學士諡文端

書山滿洲廂黃旗人署工部左侍郎乾隆二十三年往哈喇沙爾辦理屯田二十四年七月多倫回人降參贊舒赫德請移住哈

喇沙爾課以耕種繳書山就近辦理十一月疏言庫車以東哈喇沙爾以西玉古爾台至碩爾舒克台皆可引水溉田降衆五千餘分布安置臣同吐魯番公素賚滿等相度妥辦又羅布淖爾有伯克托克托屬三百餘戶懇請屯田應給其弟阿卜都賚轄二十六年還京署兵部侍郎仍兼都統

黃廷桂漢軍廂紅旗人歷官至陝甘總督乾隆二十一年二月奏從前各處調解軍營之馬多不堪用自安西至哈密經戈壁飼飲不時致多疲斃現派都司守備等官分站專管積貯草豆經過馬匹住歇時刻行走臚分情形按日呈報四月駐肅州辦事十月請設巴里坤理事同知十一月奏吐魯番回人莽阿甲克與厄魯特潛謀不軌其人在巴里坤哈密貿易者甚多恐暗通信息臣調安西兵千赴兩處分駐但數尙少若向內地調撥又慮張皇現派赴巴里坤種地兵五百塔勒納沁種地兵五百卽令同往防守尋軍營大臣奏廷桂所解馬依限到且臚壯堪用

諭獎其辦理妥速交部議叙

劉統勳字延清號爾鈍山東諸城人雍正二年進士歷官至內閣學士刑部侍郎乾隆十九年以太子太傅協辦陝甘總督事務十一月疏言西路軍營戰馬約需六萬匹派兵遞送分五大站臣於分站之中寓遞更之法第一站安馬十分每分千五百匹二三四五等站各千五百匹每起官兵按站換馬不必回空卽留爲後起更換之用官既可按站長驅而各站馬行五日卽得休息二日

詔如議速行乾隆二十年查勘巴里坤哈密駐兵事宜逆酋阿睦爾撒納叛擾伊犁定西將軍永常自木壘退師巴里坤退守哈密

嚴旨切責與永常均革職軍營効力贖罪二十二年授刑部尙書

慶桂字樹齋大學士尹文端公子也歷官至理藩院侍郎兼副都

統乾隆三十七年充軍機大臣遷伊犁參贊大臣尋調塔爾巴哈臺參贊大臣四十五年調烏里雅蘇臺將軍五十年署陝甘總督兵部尙書

盧坤字靜之直隸涿州人嘉慶己未進士累官至廣西巡撫調陝西巡撫會新疆有軍辦理轉餉事宜逆回張格爾據西四城精銳屯喀什噶爾滿漢官兵三萬七千有奇會於阿克蘇轉烏魯木齊糧濟之烏魯木齊距阿克蘇三十二站烏魯木齊僱駝七千運往阿克蘇又請以伊犁糧由冰嶺運往阿克蘇又請兵馬過戈壁加草豆添民夫酌給羊茶諸事自兵興至凱旋共費帑銀千一百餘萬轉輸不竭餉無虛糜加太子太保頭品頂戴

方承觀字宜田安徽桐城人舉鴻詞累官至陝甘總督乾隆二十年赴哈密巴里坤籌辦軍餉馬匹疏陳共備馬二萬八千匹駝四千四百匹又言哈密存茶三萬封運往軍營仍撥五萬封補存哈密舊糧十萬石亦隨撥隨補先後撥餉三十萬兩請再撥

四十萬兩備用

諭以安速爲要二十一年調回直隸總督任

阿里袞字松崖姓鈕祜氏滿洲廂黃旗人乾隆二十二年以領隊大臣辦理巴里坤事務三十三年解馬三千餘匹濟軍自哈密進發時副將軍富德統兵至呼爾瑪遇賊騎五千轉戰五日夜會公解馬至乘夜分斫賊壘賊大潰直驅黑水營賊遁入城與兆惠軍退還阿克蘇息兵數月六月再抵葉爾羌霍集占遁及明瑞阿桂追擊霍集占奪其家屬輜重直至葱嶺拔克達山汗斬霍集占獻其首回疆平九月

命留葉爾羌辦事

松筠字湘浦姓瑪特拉克氏蒙古正黃旗人嘉慶間兩任伊犁將軍伊犁兵屯戶屯回屯行之已久惟旗屯屢經舉辦皆以灌溉乏水而罷松筠相度地勢親爲履勘始得導水要領乃於惠遠城東伊犁河北岸濬大渠一道迤邐數十里又於惠遠城西北及

惠甯城東並得泉源挑渠引灌田畝闢地數千頃分給八旗官兵令閒散餘丁代耕並雇人佃種永爲世業於是伊犁旗屯大興十四年塔爾巴哈臺遺犯蒲大芳等三十餘人聚謀不軌松筠密遣人帶兵往以查金廠爲名悉擒戮之官至英武殿大學士設文清

先生

左宗棠字季高湖南湘陰人也道光壬辰舉於鄉陶澍及張亮基駱秉章皆愛其才倚如左右手因幕府勞薦擢知府宗棠乃詣胡文忠曾文正軍願以偏將自効無何朝廷欲超用宗棠

詔詢曾公曾公奏宗棠剛明耐苦曉暢戎機若假以事權必能感激圖報

詔賞四品京堂

命募軍東征遂轉戰江西援浙江廣東等省戰功甚偉同治二年

詔授總督仍兼巡撫五年正月錫一等恪靖伯是年秋移督陝

甘辦理軍務六年夏由武昌赴陝未入潼關奉

詔返旆而東合淮軍東軍皖軍擊撚平之六年十月至陝西省定三路平回之策八年之內兩省肅清光緒元年

詔陝甘總督協辦大學士左宗棠督辦新疆軍務先是以東南海防爲急有議棄關外地者宗棠力持不可然軍實奇絀各省協餉不繼夙夜憂勞常繞帳徬徨中宵不寐前後至借洋商民商千數百萬隨時以協欵抽償經營一載士飽馬騰二年春次第出關金順張曜先屯駐哈密四月劉錦棠率譚上連譚拔萃余虎恩等由巴里坤進兵八月大戰於古牧地賊敗入城城小而堅環攻連日乃克之遂收復迪化州瑪納斯城賊以死守攻之累月始克北路平駐軍烏魯木齊規復南疆三年春錦棠自北而南張曜徐戰彪自東而西錦棠攻達坂城克之遂與張曜會與吐魯番三面夾攻遂克其城下托克遜其秋連克喀喇沙爾庫車阿克蘇烏什等處一月之中行三千餘里兵威大振時

以伊犁爲俄踞恐難遠復

詔宗棠統籌全局時英人爲安集延請喀什噶爾欲中國封爲外藩宗棠奏陳方畧甚備意主進戰於是三路進攻克西四城遂於十一月克葉爾羌和闐英吉沙爾喀什噶爾南疆平捷奏詔封二等侯朝議遣宗厚使俄索伊犁條約中多不便

詔宗棠議奏逐款指駁均中要害

上壯其言嘉許之宗棠乃自請出屯哈密規復伊犁六年正月詔曾紀澤自英赴俄重議約

召還崇厚下獄二月宗棠欲進兵伊犁奏以精河一帶爲東路金順主之所部馬步萬人檄卓勝軍二千人爲之助自阿克蘇沿特克斯河爲中路張曜主之所步馬部五千人檄皖勇湘軍三千餘人及土爾扈特馬隊數百爲之助自烏什經布魯特游牧爲西路幫辦軍務劉錦棠主之所部馬步萬餘人分遣譚上連二千餘人屯喀什譚拔萃二千餘人屯阿克蘇陶金鼎王福

田等二千餘人屯哈密爲後路聲援塔爾巴哈臺與俄逼處參贊錫綸兵不足募徐學功孔才舊部二千人畀之四月宗棠發肅昇輓以行五月抵哈密俄人聞王師大出增兵守納林河以兵船翔上海京師震七月

召入京備顧問明年正月和議成交還伊犁全境公至京入朝授軍機大臣賜紫禁城騎馬

劉錦棠字毅齋松山猶子也從征江西皖南積功至巡守道同治九年松山攻金積堡陣亡錦棠統其軍左宗棠薦其才可大用詔加三品卿銜統湘軍破金積堡攻甯夏平肅州

詔加布政使銜賞穿黃馬褂擢西甯道左宗棠經營關外光緒二年四月令錦棠出嘉峪關譚上連譚拔萃均受節制五月取哈密存糧遞運巴里坤至古城分兵屯木壘河與金順約取古牧地先踞山岡黃萬鵬余虎恩以馬隊與騎賊戰譚上連譚拔萃董福祥以步隊與步賊戰大敗之遂圍古牧地敗其援賊以

開花礮攻城克之守賊六千殲焉直抵烏垣安夷纒回皆宵遁
遂克烏魯木齊迪化州僞王城於是昌吉瑪納斯北城守賊皆
遁北路畧定惟瑪納斯南城未下時帕夏踞託克遜北守建坂
城拒烏垣之軍東守吐魯番拒哈密之軍時金順攻瑪納斯南
城久不下遣羅譚黃董等十一營助之九月己丑瑪納斯南城
下戮安明尸俘海玉馬受等而悍賊盡殲焉時大雪封山諸軍
不能踰嶺三年三月張曜軍由哈密自東而西錦棠率諸軍由
烏垣自北而南先攻達坂城拔之與張曜軍會於吐魯番遂克
滿漢兩城急馳百里抵托克遜海古拉已遁與守賊戰降其衆
萬餘人托克遜三城皆下而南疆八城門戶洞開矣四月帕夏
在庫爾勒飲藥死白彥虎自踞開都河西岸時董福祥張俊自
阿哈布拉進余虎恩馳扼庫爾勒之背錦棠率大隊至曲惠白
彥虎走庫車九月癸丑收復喀喇沙爾城甲子至託利賴白彥
虎西走遂復庫車趨銅廠賊二萬拒戰敗之又擊之於上銅廠

敗之進薄阿克蘇諭以禍福羣回乞撫遂復阿克蘇踞白彥虎於胡納克河敗之令黃萬鵬張俊趨烏什譚盛典夏辛酉自西會之擊烏什克之師次阿池伯什於是東四城皆下

上念湘軍冒寒遠征一月之中行三千里克四五城

詔開錦棠西甯道缺晉秩三品京卿時帕夏子伯克胡里踞喀什噶爾十一月分三路進軍黃萬鵬等由烏什道布魯特邊爲奇兵桂錫禎由阿克蘇道巴爾楚克爲正兵均聽進止於余虎恩以取喀什噶爾錦棠駐巴爾楚克瑪納爾巴什扼葉爾羌和闐要衝甲子余虎恩駐喀什城北黃萬鵬駐喀什城東是夜三鼓兩軍抵城下賊騎出拒戰敗之俘僞帥王元林遂克喀什噶爾天色猶未明也白彥虎遁俄羅斯戊辰復葉爾羌辛未復英吉沙爾庚辰董福祥復和闐於是西四城皆下新疆平

詔三品京堂劉錦棠智勇深沉出奇制勝著由騎都尉晉爲二等男爵四年十月安曾阿里達什入寇謀襲喀什錦棠擊之於

都巴什破之五年正月安集延布魯特入寇又擊之於烏帕爾破之時崇厚使俄羅斯索伊犁議賞兵費劃伊犁西南界數百里左宗棠力持不便

詔曾紀澤赴俄議約七年和議成金順收接伊犁宗棠入京備顧問

詔公署欽差大臣屢疏懇辭八年三月與陝甘總督譚鍾麟奏設新疆郡縣與宗棠所奏者互有異同而其要在不劃新甘爲兩省疏入下吏部議行乃修城垣造壇廟建義塾廣屯田設驛站百廢備舉民困漸蘇舊時積弊漸除殆盡十年十月

詔授公爲甘肅新疆巡撫加兵部尙書銜駐烏魯木齊十四年以祖母陳太夫人老病數上書乞歸省

詔許之十五年正月特加太子少保銜公在新十餘年所有截曠存欸若干萬概留新庫八月還湘十六年正月加太子太保銜固辭且力請開缺二十年卒諡襄勤

命建專祠

陶模字子方浙江秀水人由庶常改知縣光緒元年官迪化知州兵燹之後城郭邱墟善後萬端不啻創始撫遺黎徠商賈安置屯戶酌定糧額修建城署祠宇和輯土客漢回軍民朝暮走風雪中不敢稍自暇逸逾兩載以遷去十七年抵新疆巡撫任時俄人以兵入帕米爾英人以兵擾坎巨提爭我甌脫地模謂屬壤富爭邊釁斷不可啟乃調兵駐防邊陲以固門戶而具牘與英俄外部據理力爭事獲暫彌俄人在各城通商約定商務暢盛卽定則徵稅至是梗議模謂如是則獨困吾民矣乃奏請暫免全省釐金平日嚴杜幸門以抑奔競每晤屬吏必與論邊氓艱苦狀謂改設郡縣後吏治不勝於昔何以對吾民性淡泊自奉如寒士在任不宴屬僚不乘肩輿遷代就道禁牧令供張膏秣之資皆自給其儉以勵俗類如此二十一年升任甘督後諡勤肅初強隣之壓境也勢頗岌岌而模從容不迫謂有罪我自

當之吁外交之難也阿諛媚外固無足取然願預主戰以一言致壞大局者其誰咎乎於此知忠臣謀國之苦心其通權達變非意氣用事者所能知也

饒應祺字子維湖北恩施人於同治初年以舉人投營爲陝甘督臣左宗棠所器重留參軍務迭著勤勞以功叙知府累升甘肅新疆布政使護理巡撫時河湟不靖餘黨分股西竄關隴騷然勢殊洶湧而應祺撫新與甘督陶模諸事和衷共濟不分畛域卒能消除伏莽邊境肅清且殷殷以恤刑墾荒興學飭吏諸大端爲首務確守劉爵部錦棠之舊制時人比之蕭規曹隨云任滿去官卒於哈密途次身後蕭然至同寅捐資眷口方得南下甘紳請薦專祠

詔曰可

平瑞字祥齋滿洲旗人烏魯木齊都統也時同治三年南路軍機屢失利所有八城相繼淪陷烏城之旅緣各營大半被調南征

城內空虛坂回勾結逆弁索章等乘隙蠢動於是年六月十二日突將漢城襲破平瑞聞警率滿兵馳救已無及矣逆回麇聚漢城日衆日衆孤城被圍八十餘日羅掘一空卒至糧盡援絕九月三日城陷平瑞恐落賊手先一日驅全家入藥庫中已踞其巔突火之硝烟衝霄漢而忠骸無存矣闔城官兵從死者兩萬餘人嗣於同治十三年經前都統景廉始將平瑞死事之慘及同時殉難有姓名可考之協領榮慶等一百一十四員奏邀恩恤予諡忠襄并於死事地方建立專祠榮慶等員附之其他萬餘人如田橫之客姓名久湮而不得附驥惜哉

金順宇和譜吉林滿洲人咸豐十一年以披甲投軍隨多隆阿營帶吉林馬隊驍勇敢戰穆圖善之督辦甘軍也諗知金順曉暢戎機奏請充當翼長及河肅蕩平首建出關之策慷慨請行爲諸軍倡大學士左宗棠深服其力顧大局十三年幫辦軍務進駐古城光緒紀元調補烏魯木齊都統勦撫兼施翦白逆之爪

牙斷帕夏之羽翼復名城一鼓而掃清北路旋補授伊犁將軍時伊犁尙爲俄人盤踞虎視鯨吞遇事純用其壓力而金順喻之以情爭之以理不激不隨重鎮收還且有以聯外交而尊國體焉兵燹之後人物蕭條設法撫循處處爲民興利故招商買墾屯田民賴以全活者甚衆且天性和易不自伐而好濟人人以是樂爲之用幕中文武多雋才支撐西北半壁信不誣也惜乎丁年出關皓首東返病軀積勞歿于途次歿之時堂前母老膝下兒虛口述遺摺瞻戀君親淚浮枕簟其忠愛有如此者有司以狀聞賞加太子太保銜予諡忠介並於立功地方建立專祠部下與有勞績者均附祀之

景廉字秋坪姓顏扎氏滿洲正黃旗人由編修改侍衛出爲哈密幫辦大臣時同治五年回亂甚熾肅州迤西烽煙遍地六年冬景廉率騎卒百餘繞道金塔堡冒險出關七年抵玉門八年抵任力籌轉運前敵諸軍賴以無後顧之憂者景廉之力也十年

授烏魯木齊都統以所部兵單不敷剿防乃籠絡豪傑徐學功者一時之梟雄也負胆勇饒聲望集民團二三千人專以馬隊撓賊鋒回疆畏如虎屯沙山子與趙興體沈廷芳相犄角景廉不惜金幣招之麾下屢建奇功詳於武功志十二年八月拜欽差大臣之命督辦新疆軍務統籌全局疏請三路進兵並於古城奇台濟木薩木壘河一帶廣興屯田且耕且防先裕兵食而後次第削平諸匪謀成旋遷去致未竟所施論者惜之卒建專祠與春滿文林並垂不朽云

春滿字少山吉林鑲白旗人由伊犁索倫額魯特察哈爾領隊大臣補授塔爾巴哈台參贊於咸豐季年曾隨僧忠親王轉戰山東江南數省蕩平髮逆載在武功志中當春滿之西上也正值回亂方熾伊犁又爲俄人襲據內憂外患紛至迭乘光緒十八年二十年間兩次會同俄官補勘南北界牌強隣毗連犬牙相錯稍有不慎卽起釁端而春滿審慎精詳相機因應卒有以戢

虎狼之心而無傷於國體焉庚子之變憂憤成疾卒于甘垣有司爲請附祀於金忠介祠

詔許之

金運昌字明安卓勝軍之名將也關內戰績載在武功方其統兵西上南八城賊尙鴟張卽慷慨告奮勇請前敵督辦軍務左宗棠壯之烏城新復伏莽未靖人心皇皇非勁旅良將不足以資鎮撫經左宗棠奏署烏魯木齊提督並率卓勝舊部分紮各要隘而人心始安帖運昌以懸軍塞外兵食維艱乃請於該軍餉內籌買牛具興辦屯田迄三台滋泥泉九運街七道灣凡該軍防所均仿操七耕三之例躬率士卒耕耨田間秋收麥糧數千斛兵食以裕烏城頽敗首建議修葺之並修瑪納斯呼圖壁等城一律堅固足資捍衛且未動支公帑云城西舊有河一道水勢洶湧行人病之乃飭該軍設椿挑壩創建石橋遠近稱便焉因錢法不行多方籌集資本設官錢局以便市用泉寶流通兩

次捐廉放賑饑民賴以存活凡諸義舉靡不踴躍爭先甘棠黍
雨烏民至今思之弗衰旋以傷發卒于官奏建專祠堪與金忠
介並垂不朽也

新疆圖志卷一百八

武功一

漢

李廣利太初元年以爲貳師將軍發屬國六千騎及郡國惡少年數萬人以往期至貳師城故號貳師將軍故浩侯王恢使道軍旣西過鹽水當道小國各堅城守不肯給食攻之不能下下者得食不下者數日則去比至郁成士財有數千攻郁成郁成拒之所殺傷甚衆貳師將軍與左右計至郁成尙不能舉况至其王都乎引還留屯敦煌其夏漢亡浞野兵二萬餘於匈奴公卿議者皆願罷宛軍專力攻胡天子業出兵誅宛宛小國而不能下則大夏之風漸輕漢而宛善馬絕不來烏孫輪臺易苦漢使爲外國笑迺案言伐宛尤不便者鄧光稱赦囚徒扞寇盜發惡少年及邊騎出敦煌六萬人良私從者不計牛十萬馬三萬驢橐駝以萬數齎糧兵弩甚設天下騷轉相奉伐宛五十餘校尉宛城中無

井汲城外流水於是遣水工徙其城下水空以穴其城益發成
甲卒十八萬酒泉張掖北置居延休屠以衛酒泉而發天下七
科適及載糒給貳師轉車人徒相連屬至敦煌而拜習馬者二
人爲執驢馬校尉備破宛擇取善馬云於是貳師後復行兵多
所至小國莫不迎出食給軍至輪臺輪臺不下攻數日屠之自
此而西平行至宛城兵到者三萬宛兵迎擊漢兵漢兵射敗之
宛兵走入保其城決其水原移之則宛固已憂困圍其城攻之
四十餘日宛貴人謀曰王毋寡匿善馬殺漢使今殺王而出善
馬漢兵宜解卽不迺力戰而死未晚也宛貴人皆以爲然共殺
王其外城壞虜宛貴人勇將煎靡宛大恐走入城中相與謀曰
漢所爲攻宛以王毋寡持其頭遣人使貳師約曰漢無攻我我
盡出善馬恣所取而給漢軍食卽不聽我我盡殺善馬康居之
救且又至至我居內康居居外與漢戰熟計之何從時康居候
視漢兵尙盛不敢進貳師聞宛城中新得漢人知穿井而其內

食尙多計以爲來誅首惡者毋寡毋寡頭已至如此不許則堅守而康居候漢兵罷來救宛破漢軍必矣軍吏皆以爲然許宛之約宛乃出其馬令漢自擇之而多出食食漢軍漢軍取其善馬數十匹中馬以下牝牡三千匹而立宛貴人之故時與漢善者名昧蔡爲宛王與盟而罷兵迺封廣利爲海西侯食邑八千戶

上官桀時爲搜粟都尉受命攻郁成初貳師起敦煌西爲人多道上國不能食分爲四軍從南北道校尉王申生故鴻臚壺充國等千餘人別至郁成城守不肯給食申生去大軍二百里負而輕之攻郁成急郁成窺知申生之軍少晨用三千人攻殺申生等數人脫亡走貳師所貳師命桀攻之郁成破遂降其王出走康居桀追至康居康居聞漢已破宛出郁成王與桀桀令四騎士縛詣大將軍歸漢錄功以敢於深入爲少

趙弟上邽騎士上官桀旣得郁成王於康居令四騎士縛守詣大

將軍弟與焉四人相謂郁成漢所毒今生將卒失大事欲殺莫適先擊弟拔劍擊斬之上以爲功封新時侯

趙始成伐宛及郁成之役主軍政功最多封光祿大夫李哆從貳師伐宛及郁成上以爲有計謀除上黨太守

傅介子北地人也以從軍得官先是龜茲樓蘭王皆嘗殺漢使者元鳳中介子以駿馬監求使大宛因詔令責樓蘭龜茲國至樓蘭責其王教匈奴遮殺漢使大兵方至王苟不教匈奴匈奴使道至諸國何以不言王謝服言匈奴使屬過當至烏孫道過龜茲介子至龜茲復責其王王亦服罪介子從大宛還到龜茲龜茲言匈奴使從烏孫還在此介子因率其吏士共誅斬匈奴使者還奏事拜中郎將遷平樂監介子謂大將軍霍光曰樓蘭龜茲數反復而不誅無所懲艾介子過龜茲時其王近就人易也願往刺之以示威諸國大將軍曰龜茲道遠且險之於樓蘭於是白遣介子與士卒俱齎金幣揚言以賜外國爲名至樓蘭樓

蘭王意不親介子介子佯引去至其西界使譯謂曰漢使者持黃金錦繡行賜諸國王不來受我去之西國矣卽出金幣以示譯譯回還報王王貪漢物卽來見使者介子與坐陳物示之飲酒皆醉介子謂王曰天子使我私報王王起隨介子入帳中屏語壯士二人從後刺之刃交胸立死介子告諭以王負漢罪天子遣我來誅王當更立前太子質在漢者漢兵方至毋敢動動滅國矣遂持王首還詣闕公卿將軍議者咸以爲功封爲義陽侯食邑七百戶

常惠太原人也少時家貧自奮應募隨蘇武使匈奴昭帝時迺還漢拜爲光祿大夫宣帝本始二年遣惠使烏孫公主及昆彌皆遣使因惠言匈奴連發大兵擊烏孫取車師地收其人民去使使脅求公主欲隔絕漢昆彌願發國中精兵自給人馬五萬騎盡力擊匈奴唯天子出兵以救公主昆彌於是漢大發十五萬騎五將軍分道出語在匈奴傳以惠爲校尉持節護烏孫兵昆

彌自將翎侯以下五萬餘騎從西方入至右谷蠡庭獲單于父
行及嫂居次名王騎將以下三萬九千人得馬牛驢駝五萬餘
匹羊六十餘萬頭遂封爲長羅侯復遣惠持金幣還錫烏孫貴
人有功者惠因奏請龜茲國嘗殺校尉賴丹未伏誅請便道擊
之宣帝不許大將軍霍光風惠以便宜行事惠與吏士五百人
俱至烏孫還過發西國兵二萬人令副使發龜茲東國二萬人
烏孫兵七千人從三面攻龜茲兵未合先遣人責其王以前殺
漢使狀王謝曰迺我先王時爲貴人姑翼所誤耳我無罪惠曰
卽如此縛姑翼來吾置王王執姑翼詣惠惠斬之甘露中以惠
爲右將軍典屬國如故元帝三歲薨諡曰壯武

甘延壽字君况北地郁郅人也少以良家子善騎射爲羽林投石
拔距絕於等倫嘗超踰羽林亭樓由是遷爲卽試弁爲期門以
材力愛幸車騎將軍許嘉薦延壽爲郎中諫大夫使西域都護
騎都尉與副校尉陳湯共誅郅支單于封義或侯薨諡曰壯

陳湯字子公山陽瑯丘人也富平侯張勃與湯交高其能初平二年詔列侯舉茂材勃舉湯建昭三年與甘延壽出西域沈勇有大慮多謀策喜奇功每過城邑山川常登望既領外國與延壽謀曰夷狄畏服大種其天性也西域本屬匈奴今郅支單于威名遠聞侵烏孫大宛常爲康居畫計欲降服之如得此二國北擊伊列西取安息南排月支數年之間城郭諸國危矣且其人剽悍好戰伐數取勝久畜之必爲西域患郅支雖所在絕遠蠻夷無金城强弩之守如發屯田吏士毆從烏孫兵直指其城下彼亡無所之守不足自保千載之功可一朝成也延壽亦以爲然欲奏請之湯曰國家與公卿議大策非凡所見事必不從會其久病湯遂發城郭諸國兵車師戊己校尉屯田吏士部勒行陳別爲六校三校從南道踰蔥嶺其三校都護自將從北道入赤谷過烏孫涉康居界至闐池西而康居副王抱閼將數千騎寇赤谷城東殺略大昆彌千餘人毆畜產甚多湯縱胡兵擊之

殺四百六十人得其所略民四百七十人還付大昆彌其馬牛羊以給軍食又捕得抱闐貴人伊奴毒入康居東界令軍不得爲寇間呼其貴人屠墨見之諭以威信與飲盟遣去徑引行未至單于城六十里止營復捕得康居貴人貝色子男開牟以爲導貝色子卽屠墨母之弟皆怨單于由是具知郅支情明日引行未至城三十里止營單于遣使問漢兵何以來應曰單于上書言居困阨願歸計強漢身入朝見天子哀閔單于棄大國屈意康居故使都護將軍來迎單于妻子恐左右驚動故未敢至城下使數往來相答報延壽湯因讓之我爲單于遠來而至今無名王大人見將軍受事者何單于忽大計失客主之禮也願單于與大臣審計明日前至郅支城離城三里止營傳陳望見單于城上延壽湯令軍聞鼓音皆薄城下四面圍城仰射城中樓上人樓上人下走土城外有重木城從木城中射頗殺傷外人外人發薪燒木城夜數百騎欲出外迎射殺之漢兵四面推

鹵橈並入土城中單于男女百餘人走入大內漢兵縱火吏士爭入單于被創死得漢使節二及谷吉等所齎帛者斬閼氏太子名王以下千五百一十八級生虜百四十五人又降虜千餘人然以矯制幾獲罪成帝重其功終封爲關內侯薨元帝朝諡曰破胡壯侯

段會宗字子松天水上邽人也竟甯中以杜陵令五府舉爲西域都護騎都尉光祿大夫西域敬其威信小昆彌爲國民所殺諸翎侯大亂徵會宗爲左曹中郎將光祿大夫使安輯烏孫立昆彌兄末振將定其國而還明年末振將殺大昆彌會病死漢憾誅不加元延中復遣會宗發戊己校尉諸國兵誅末振將太子番邱會宗恐大兵入烏孫驚番邱亡逃不可得卽留所發兵墊婁地還精兵三十弩徑至昆彌所在召番邱責以末振將骨肉相殺殺漢公主未伏誅而死使者受詔誅番邱卽手劍殺之官屬以下驚恐馳歸小昆彌烏犂靡者末振將兄也勒兵數千騎

國會宗會宗爲言來誅之意令圍守殺我如取漢牛一毛耳宛王郅支頭懸藁街烏孫所知也昆彌以下服曰未振將負漢誅其子可也獨不可告我令飲食之邪會宗曰豫告告昆彌逃匿之爲大罪卽飲食以付我傷骨肉恩故不先告昆彌以下號泣罷去會宗還奏事公卿議會宗權得便宜以輕兵深入烏孫卽誅番邸宜明國威宜加重賞天子賜會宗爵關內侯黃金百觔年七十五病死烏孫中城郭諸國俱爲之發喪

孫建小昆彌都護與段會宗同時小昆彌季父卑爰寔將衆八萬餘口北附康居謀欲借兵並兼兩昆彌漢復遣孫會宗安輯建與會宗並力以備之

馮奉世字子明上黨潞人也本始中從軍擊匈奴軍罷復爲卽先是漢出使西域多辱命不稱或貪污爲外國所苦是時烏孫大有擊匈奴之功而西域諸國新輯漢方善遇欲以安之選可使外國者前將軍增舉奉世以衛侯使持節送大宛諸國客至伊

修城都尉宋將言莎車與旁國共攻殺漢所置莎車王萬年並殺漢使者奚充國時匈奴又發兵攻車師城不能下而去莎車遣使揚言北道諸國已屬匈奴矣於是攻劫南道與畝盟叛漢從鄯善以西皆絕不通都護鄭吉校尉司馬意皆在北道諸國間奉世與其副嚴昌計不急擊之則莎車日強其勢難制必危西域遂以節諭告諸國王因發其兵南北兩道合萬五千人進擊莎車攻拔其城莎車王自殺傳其首詣長安諸國悉平威振西域奉世乃罷兵以聞宣帝召見韓增曰賀將軍所舉得人奉世遂西至大宛大宛聞其斬莎車王敬之異於他使得其名馬衆龍而還上甚悅下議封奉世丞相將軍皆曰春秋之義大夫出疆有可以安國家則額之可也奉世功效尤著宜加爵土之賞少府蕭望之獨以奉世奉使有旨而擅矯制違命發諸國兵雖有功效不可爲後世法卽封奉世開後奉使者利以奉世爲比爭逐發兵要功萬里之外爲國家生事於夷狄漸不可長奉

世不宜受封上善望之議以奉世爲光祿大夫水衡都尉元帝卽位爲執金吾後以破西羌功賜爵關內侯

趙破奴太原人嘗亡入匈奴已而歸漢爲驃騎將軍司馬出北地封從票侯後一歲爲匈奴將軍攻胡至匈奴川元封三年樓蘭王姑師攻擊漢使爲匈奴耳目上遣破奴擊之破奴以七百騎虜樓蘭王遂破車師因舉兵威以困烏孫大宛之屬封破奴爲浞野侯

劉張官驃都尉十七年冬十一月出敦煌昆侖塞擊破白山虜於蒲類海上遂入車師置戍己校尉西域都護

班超字仲升扶風平陵人徐令彪之少子也爲人有志不修細節家貧常爲官傭書投筆歎曰大丈夫無他略猶當效傅介子張騫立功異域以取封侯安能久事筆硯間乎其後行詣相者相者指曰生燕頤虎頭飛而食肉此萬里侯相也久之顯宗十六年奉車都尉竇固出擊匈奴以超爲假司馬將兵別擊伊吾戰

於蒲類海多斬首虜固以爲能遣與從事郭恂俱使西域超到
鄯善鄯善王廣奉超禮敬甚備後忽更疎懈超乃召侍胡詐之
曰匈奴使來數日今安在乎侍胡惶恐具言其狀超乃閉侍胡
悉會其吏士三十六人與共飲以激怒之曰卿曹與我俱在絕
域如令鄯善收吾屬送匈奴骸骨長爲豺狼食矣爲之奈何官
屬皆曰死生從司馬超曰當今之計獨有因夜以火攻虜便可
盡殄也滅此虜則鄯善破膽功成事立矣衆曰善初夜遂將吏
士往奔虜營會天大風超令十人持鼓藏虜舍後約曰見火然
皆當鳴鼓大呼餘人悉持兵弩夾門而伏超乃順風縱火前後
鼓噪虜衆驚亂超手格殺三人吏兵斬其使及從事三十餘級
餘衆百許人悉燒死明日召鄯善王廣以虜使者首示之一國
震怖超曉告撫慰遂納子爲質還奏於竇固固大喜具上超功
是時于寘王廣德新攻破莎車遂雄張南道而匈奴遣使監護
其國超既至于寘廣德素聞超在鄯善誅滅虜使大惶恐卽攻

殺匈奴使者而降超超重賜其王以下因鎮撫焉明年春超從間道至疏勒遣吏田慮先往降之勅慮曰兜題若不卽降便可執之慮旣到兜題見慮輕弱殊無降意慮因其無備遂前却縛兜題左右出其不意皆驚懼奔走慮馳報超超卽赴之悉召疏勒將吏說以龜茲無道之狀因立其故王兄子忠爲王國人大悅十八年帝崩焉耆以中國大喪遂攻沒都護陳睦超孤立無援而龜茲姑墨數發兵攻疏勒超守槃橐城與忠爲守衛士吏單少拒守歲餘肅宗卽位以陳睦新沒恐超單危不能自立下詔徵超超發還王侯以下皆號泣曰依漢使如父母誠不可去互抱超馬脚不得行乃更還疏勒建初三年超率疏勒康居于寘拘彌兵二萬人攻姑墨石城破之斬首七百級超欲因此巨平諸國乃上疏請兵書奏帝知其功可成議欲給兵平陵人徐幹素與超同志上疏願奮身佐超五年遂以幹爲假司馬將弛刑及義從千人就超先是莎車以爲漢兵不出遂降於龜茲

而疏勒都尉番辰亦復反叛會徐幹適至超遂與幹擊番辰大破之斬首千餘級明年龜茲姑墨溫宿皆降乃以超爲都護徐幹爲長史拜白霸爲龜茲王遣司馬姚光送之超與光共脅龜茲廢其王尤利多而立白霸使光將尤利多還詣京師超居龜茲它乾城徐幹屯疏勒西域唯焉耆危須尉犂以前沒都護懷二心其餘悉定六年秋超遂發龜茲鄯善等八國兵合七萬人及吏士賈客千四百人討焉耆兵到尉犂界而遣曉說焉耆尉犂危須曰都護來者欲鎮撫三國卽欲改過向善宜遣大人來迎當賞賜王侯以下事畢卽還令賜王綵五百匹焉耆王廣遣其左將北鞬支奉牛酒迎超超詰鞬支曰汝雖匈奴侍子而今秉國之權都護自來王不以時迎皆汝罪也於是賜而遣之廣乃與大人迎超於尉犂奉獻珍物七月晦到焉耆去城二十里止營乃期大會諸國王因揚聲當重加賞賜於是焉耆王廣尉犂王汎及北鞬支等三十人相率詣超坐定超怒詰廣曰危須

王何故不到遂叱吏士收廣汎等於陳睦故城斬之傳首京師因縱兵鈔掠斬首五千餘級更立元孟爲焉耆王超留焉耆半歲慰撫之於是西域五十餘國悉皆納質內屬焉明年下詔封超爲定遠侯邑汗戶

段彭酒泉太守也孝章帝建初元年奉命督師救戊己校尉耿恭彭討擊車師大破之因罷戊己校尉官至和帝永元三年始復置之

王林西域長史也孝和帝永元九年奉命督師擊車師後王大破之獲其王斬首以還

班勇字宜僚少有父風永初元年西域反叛以勇爲軍司馬與兄雄俱出敦煌迎都護及西域甲卒而還因罷都護後西域絕無漢吏十餘年延光二年夏復以勇爲西域長史將兵五百人出屯柳中明年正月勇至樓蘭以鄯善歸附特加三綬而龜茲王白英猶自疑未下勇開以恩信白英乃率姑墨溫宿自縛詣勇

降勇因發其兵步騎萬餘人到車師前王庭擊走匈奴伊蠡王於伊和谷收得前部五千餘人於是前部始復開通還屯田柳中四年秋勇發敦煌張掖酒泉六千騎及鄯善疏勒車師前部兵擊後部王軍就大破之首虜八千餘人馬畜五萬餘頭捕得軍就及匈奴持節使者將至索班沒處斬之以報其恥傳首京師永建元年更立後部故王子加特奴爲王勇又使別校誅斬東且彌王亦更立其種人王於爲是車師六國悉平其冬勇發諸國兵擊匈奴呼衍王亡走其衆二萬餘人皆降捕得單于從兄勇使加特奴手斬之以結車師匈奴之隙北單于自將萬餘騎入後部至金且谷勇使假司馬曹俊馳救之單于引去俊追斬其貴人骨都侯於是呼衍王遂徙居枯梧河上是後車師無復虜跡城郭唯皆安焉耆王元孟未降二年勇上請攻元孟於是遣敦煌太守張朗將河西四郡兵三千人配勇因發諸國兵四萬餘人分騎爲兩道擊之勇從南道朗從北道約期俱至焉

耆而朗先有罪欲徼功自贖遂先期至爵離關遣司馬將兵前戰首虜二千餘人元孟懼誅逆遣使乞降張朗徑入焉耆受降而還元孟竟不肯面縛唯遣子詣闕貢獻朗遂得免誅勇以後期徵下獄免後卒於家

張朗敦煌太守孝順帝永建二年夏六月奉命偕西域長史班勇討焉耆尉犂危須三國破之三國並遣子貢獻復將河西四郡兵擊焉耆王元孟元孟乞降朗往受降而還

田慮西域軍吏也隨班超駐疏勒時龜茲王建爲匈奴所立依恃虜威據有北道攻破疏勒殺其王而立龜茲人兜題爲疏勒王後超從間道至疏勒去兜題所居槃橐城九十里逆遣慮先往降之勅慮曰兜題本非疏勒種國人必不用命若不卽降便可執之慮旣到兜題見慮輕弱殊無降意慮因其無備遂前刼縛兜題左右出其不意皆驚懼奔走慮馳報超超卽赴之悉歸疏勒將吏說以龜茲無道之狀因立其故王兄子忠爲王國人大

悅

曹宗敦煌大守也元初六年宗遣長史索班將千餘人屯伊吾車師前王及鄯善王皆來降於班後數月北單于與車師後王遂攻班沒其軍擊走前王略有北道鄯善王急求救於宗宗請於朝出兵五千人擊匈奴報索班之恥大破之因復取西域

梁懂字伯威北地弋居人也延平元年拜西域副校尉懂行至河西會西域諸國反叛攻都護任尙於疏勒尙上書求救詔懂將河西四郡羌胡五千騎馳赴之懂未至而尙已得解會徵尙還以騎都尉段禧爲都護西域長史趙博爲騎都尉禧博守它乾城它乾城小懂以爲不可固乃譎說龜茲王白霸欲入共保其城白霸許之吏人固諫白霸不聽懂旣入遣將急迎禧博合軍八九千人龜茲吏人並叛其王而與溫宿姑墨數萬兵反共圍城懂等出戰大破之連兵數月胡衆敗走乘勝追擊凡斬百萬餘級龜茲乃定而道路尙隔檄書不通歲餘朝廷憂之公卿議

者以爲西域阻遠數有背叛吏士屯田其費無已永初元年遂罷都護遣騎都尉王弘發關中兵迎懂禧博及伊吾盧柳中屯田吏士二年春還至敦煌會衆羌反叛朝廷大發兵擊之逆詔懂留爲諸軍援懂至張掖日勒諸羌種萬餘人攻亭侯殺畧吏人懂進兵擊大破之乘勝追至昭武虜遂散走其能脫者十二三及至姑臧羌大豪三百餘人詣懂降並慰譬遣還故地河西四郡復安朝廷嘉之璽書勞勉委以西方事令爲諸軍節度

耿恭字伯宗國弟廣之子也少孤慷慨多大略有將帥才永平十七年冬騎都尉劉張出擊車師請恭爲司馬與奉車都尉賁固及從弟駙馬都尉秉破降之姑置西域都護戊己校尉乃以恭爲戊己校尉屯後王部金蒲城謁者關寵爲戊己校尉屯前王柳中城屯各置數百人恭至部移檄烏孫示漢威德大昆彌以下皆歡喜遣使獻名馬及奉宣帝時所賜公主博具願遣子入侍恭乃發使齎金帛迎其侍子明年三月北單于遣左鹿蠡王

二萬騎擊車師恭遣司馬將兵三百人救之道逢匈奴騎多皆爲所歿匈奴遂破殺後王安得而攻金蒲城恭乘城搏戰以毒藥傳矢傳語匈奴曰漢家箭神其中瘡者必有異因發強弩射之虜中矢者視創皆沸遂大驚會天暴風雨隨雨擊之殺傷甚衆匈奴震怖相謂曰漢兵神真可畏也遂解去恭以疏勸城傍有澗水可固守五月引兵據之七月匈奴復來攻恭恭募先登數千人直馳之胡騎散走匈奴遂於城下擁絕澗水恭於城中穿井十五丈不得水吏士渴乏竿馬糞而飲之恭仰嘆曰聞昔貳師將軍拔佩刀刺山飛泉涌出今漢德神明豈有窮哉乃整衣服向井再拜爲吏士禱有頃水泉奔出衆皆稱萬歲乃令吏士揚水以示虜虜出不意以爲神明遂引去時焉耆龜茲攻歿都護陳睦北虜亦圍關寵於柳中會顯宗崩救兵不至車師復叛與匈奴共攻恭恭厲士衆擊走之後王夫人先世漢人常私以虜情告恭恭又給以糧餉數月食盡窮困乃煮鎧弩食其筋

革恭與士推誠同死生故皆無二心而稍稍死亡餘數十人單于知恭已因欲必降之復遣使招恭曰若降者當封爲白屋王妻以女子恭乃誘其使上城手擊殺之炙諸城上虜官屬望見號哭而去單于大怒更益兵圍恭不能下初關龍上書求救時肅宗新卽位乃遣征西將軍耿秉屯酒泉行太守事遣秦彭與謁者王蒙皇甫援發張掖酒泉敦煌三郡及鄯善兵合七千餘人建初元年正月會柳中擊車師攻交河城斬首三千八百級北虜驚走車師復降會關龍已歿蒙等聞之便欲引兵還先是恭遣范羌至敦煌迎兵士寒服羌因隨王蒙軍俱出塞羌固請迎恭諸將不敢前乃分兵二千人與羌從北山迎恭遇大雪丈餘軍僅能至城中夜聞兵馬聲以虜來大驚羌乃遙呼曰我范羌也漢遣軍迎校尉耳城中皆稱萬歲開門共相持涕泣明日遂相隨俱歸虜兵追之且戰且行吏士素饑困發疏勒時尙有二十六人隨路死歿三月至玉關惟餘十三人衣履穿決形容

枯槁中郎將鄭衆爲恭已下洗沐易衣冠及恭至雒陽鮑昱奏恭節過蘇武宜蒙爵賞於是拜爲騎都尉

唐

信安王禕時爲朔方節度使吐蕃陷石堡城留兵據之侵擾河右上命禕與河西隴右同議攻取諸將咸以爲難攻禕引兵深入急攻拔之分兵據要害拓地千餘里上大悅更名曰振武黑齒常之員外將軍也李敬玄爲吐蕃所敗劉審禮深入敗沒常之夜帥死士襲擊虜營虜乃遁去敬玄收餘衆返鄯善州上嘉常之功擢拜武衛將軍

鄭仁泰龍朔初武衛將軍也同紇同羅僕固犯邊詔以仁泰爲鐵勒道行軍大總管仁泰驍勇善戰所向披靡遂討而平之

裴行儉字守約絳州聞喜人麟德二年擢安西都護西域諸國多慕義歸附儀鳳二年十姓可汗阿史那都支及遮旬諸蕃部落以動安西朝廷欲討之行儉曰吐蕃方熾敬元失律審禮喪元

安可更爲西方生事乎今彼斯王死其子質京師如遣使立之卽路出二蕃若權以制事可不勞而有功也帝因詔册行送彼斯王且可安撫大食使徑莫賀延磧風磧晝隕導者迷將士飢乏行儉止營致祭令曰水泉非遠衆小安俄而雲散風靜行數百步水草豐美後來者莫識其處衆皆驚以方漢貳師將軍行至西州諸番郊行儉召豪傑千餘人自隨揚言大熱未可以進宜駐軍須秋都支覘知之不設備行儉徐召四鎮酋長僞約畋謂曰吾念此樂未忘孰能從吾獵者於是子弟願從者萬人乃陰勒部伍倍道而進去都支帳十餘里先遣所親問安否外若閑暇非討襲者又使人趣召都支都支本與遮旬計及秋拒使者已而聞軍至倉卒不知所出率子弟五百餘人詣營謁遂擒之是日傳契箭召諸酋長悉來請命並執送碎葉城簡精騎約齎襲遮旬道獲遮旬使者釋之俾往諭其主并言都支已擒狀遮旬乃降悉俘至京師將士爲刻石碎葉城以紀功帝親勞宴

曰行儉提孤軍深入萬里兵不血刃可謂文武兼備矣卽拜禮部尙書兼右衛大將軍

王方翼字仲翔并州祁人裴行儉討遮旬奏爲副檢校安西都護徙故都護杜懷寶爲庭州刺史方翼築碎葉城面三門紆還多趣以詭出入五旬畢西域胡縱觀莫測其方畧悉獻珍貨未幾徙庭州刺史而懷寶自金山都護更鎮安西遂失蕃戎之和永淳初十姓阿史那車薄噉叛圍弓月城方翼引軍戰伊麗河敗之斬首千級俄而三姓咽麵兵十萬踵至方翼次熱海進戰矢著臂引佩刀斷去左右莫知所部雜虜謀執方翼爲內應方翼番召會軍中厚賜以次出壁外縛之會大風雜金鼓而號呼無聞者殺七千人卽遣騎分道襲咽麵等皆驚潰烏鶻引兵遁去擒首領突騎施等三百人西戎震服明年召方翼議西域事引見奉天宮賜食帝前帝見衣有汗濯處問其故具對熱海苦戰狀視其創帝咨嗟久之賜寶良厚

蘇烈字定方擢伊麗道行軍大總管復征賀魯以任雅相回紇婆
潤爲副出金山北先擊處木昆部破之俟斤嬾獨祿擁衆萬帳
降定方撫之發其千騎並回紇萬人進至曳咥河賀魯率十姓
兵十萬拒戰輕定方兵少舒左右翼包之定方令步卒據險建
矛向外親引勁騎陳北原賊三突步陳不能入定方因其亂擊
之鏖戰三十里斬首數萬級賊大奔明日振兵復進五弩矢畢
舉衆降賀魯獨與處木昆屈律啜數百騎西走定方令副將蕭
嗣業回紇婆潤率領虜兵越邪羅斯川追北定方與雅相領新
附兵絕其後會大雪吏請少休定方曰虜恃雪方止舍謂我不
能進若縱使遠遁則莫能擒遂勒兵進至雙河與彌射步眞合
距賀魯所百里下令陣而行薄金牙山方賀魯將敗定方縱擊
破其牙下數千人悉歸所部賀魯走石國彌射子元爽以兵與
嗣業會縛賀魯以還由是修亭障列蹊隧定疆畛問疾收背唐
之州縣極西海矣高宗臨軒定方戎服奉賀魯以獻策功拜左

驍衛大將軍邢國公別封子慶節爲武邑縣公會思結闕俟斤都曼先鎮諸胡刦所部及疏勒朱俱波喝槃陀三國復叛詔定方還爲安撫大使率兵至葉葉水而賊堞馬頭川定方選精卒萬三千騎襲之晝夜馳三百里至其所都曼驚無素備遂大敗走馬保城師進攻之都曼計窮遂而縛降俘獻於乾陽殿有司請論如法定方頓首請曰臣向諭陛下意許以不死願丐其命帝曰朕爲卿全信乃宥之葱嶺以西遂定加食邢州鉅鹿三百戶遷左武衛大將軍

薛仁貴絳州龍門人高宗顯慶間詔副鄭仁泰爲鐵勒道行軍總管時九姓十餘萬衆令驍騎數十來挑戰仁貴發三矢輒殺三人於是虜氣懾皆降仁貴慮爲後患悉坑之轉討磧北餘衆擒僞葉護兄弟三人以歸軍中歌曰將軍三箭定天山壯士長歌入漢關九姓遂衰鐵勒有思結多覽葛等部先保天山及仁泰至懼而降仁泰不勒虜其家以賞軍賊相率遁去咸亨元年吐

蕃入寇命爲邏婆道行軍大總管率將軍阿史那道眞郭待封擊之以援吐谷渾待封嘗爲鄯城鎮守與仁貴等夷及是恥居其下頗違節度初軍次大非川將趨烏海仁貴曰烏海地險而瘴吾人死地可謂危道然速則有功遲則敗今大非嶺寬平可置二柵悉內輜重留萬人守之吾倍道掩賊不整滅之矣乃約齋至河口遇賊破之多所殺掠獲牛羊萬計進至烏海城以待後援待封初不從領輜重踵進吐蕃率衆二十萬邀擊取之糧仗盡沒待封保險仁貴退軍大非川吐蕃益兵四十萬來戰王師大敗仁貴與吐蕃將論欽陵約和乃得還吐谷渾遂沒

王孝傑京兆新豐人長壽元年爲武威道總管與阿史那忠節討龜茲于闐疏勒碎葉等城武后曰貞觀中西境在四鎮其後不善守棄之吐蕃今故土盡復孝傑功也乃遷左衛大將軍

唐瑋字休璟始平人也垂拱中遷安西副都護會吐蕃破焉耆安西道大總管韋待價等敗休璟收其潰亡以定西土援靈州都

督乃陳方畧請復四鎮武后遣王孝傑拔龜茲等城自休璟倡始

哥舒翰其先蓋突騎施酋長哥舒部之裔父道元爲安西都護將軍赤水軍使故仍居安西初從節度使王倕倕攻沂城使翰經略稍知名又事王忠嗣署牙將遷左衛郎將吐蕃盜邊與翰遇苦拔海持半段槍迎擊所向輒披靡名蓋軍中擢授右武衛將軍爲河源軍使

郭虔瓘齊州歷城人開元初錄軍閥累遷右驍衛將軍兼北庭都護金山道副大總管明年突厥默啜子同俄特勒圍北庭虔瓘斬之以功授冠軍大將軍安西副大都護

衛伯玉史失其何所人天寶中從安西府積勞至員外諸衛將軍乾元二年賊將李歸仁以騎五千入寇伯玉與戰強子阪破之獲馬六百匹遷羽林大將軍徙四鎮北庭行營節度使

姜確字行本以字顯秦州上邽人高昌之役爲行軍副總管出伊

州距柳谷百里依山造攻械增損舊法械益精其處有漢班超紀功碑行本磨去古刻更刊頌陳國威靈遂與侯君集進平高昌戰有功璽書慰勞還爲金城郡公

薛萬均本敦煌人後徙家京兆咸陽副侯君集擊高昌麴智盛堅守未下萬均麾軍進智盛懼乃降進潞國公

侯君集幽州三水人高昌不臣拜交河道行軍大總管出討高昌王麴文泰曰唐去我七千里磧鹵二千里無水草冬風裂肌夏風如焚行賈至者百之一安能致大兵乎使能頓吾城下一再旬食盡當潰吾且係而虜之君集次磧口而文泰死子智盛襲位進營柳谷侯騎言國方葬死君諸將請襲之君集曰不可天子以高昌驕慢使吾襲行天罰今襲人於墟墓間非問罪也於是鼓行而前賊嬰城自守遣諭之不下乃刊木塞塹引撞車毀其堞飛石如雨所向無敢當因拔其城俘男女七千進圍都城智盛乃降高昌平君集刻石紀功還

杜暹濮州濮陽人開元四年會安西都護張孝嵩遷太原尹或言
暹往使安西虜服其清令猶慕思乃奪服拜黃門侍郎兼安西
副大都護明年于闐王尉遲眺約突厥諸國叛暹覺其謀發兵
討之支黨悉誅更立君長于闐遂安以功加光祿大夫守邊
楊弘禮字履莊隋尙書令楊素弟之子爲崑邱道總管破處密殺
焉耆王獲龜茲于闐王凱旋大臣疾之下遷涇州刺史

郭孝恪許州人爲西州道行軍總管以伐焉耆貞觀十八年九月
孝恪及焉耆戰敗之

執失思力爲右領軍大將軍貞觀十九年十二月與薛延陀戰大
敗之

李世勣伐薛延陀貞觀二十年七月辛亥世勣及薛延陀戰大敗
之

契苾何力爲左驍衛大將軍崑邱道行軍大總管貞觀二十一年
十二月戊寅率三總管以伐龜茲二十三年正月俘龜茲王以

獻

阿史那社爾爲崑邱道行軍總管貞觀二十二年八月辛未伐薛延陀餘部於金山九月庚辰及薛延陀餘部處月處密戰敗之程知節爲崑邱道行軍大總管永徽六年五月以伐賀魯顯慶元年八月程知節及賀魯部歌羅處月戰於榆慕谷敗之九月程知節及賀魯戰於坦篤城敗之至顯慶二年蘇定方乃執賀魯海政受詔討龜茲龍朔二年西突厥寇庭州刺史來濟死之敕興昔亡繼往絕二可汗與俱興昔亡有怨于繼往絕密請海政矯敕斬之其部落走亡海政進討平之繼往絕死十姓無主附於吐蕃

張孝嵩奉使廓州聽以便宜從事拔汗那者古烏孫也內附久吐蕃攻之其王奔安西求救孝嵩遂率旁側部落兵萬餘人出龜茲西數千里下數百城至是孝嵩傳檄諸國威振西域大會諸國皆請降勒石紀功而還是歲突厥部三姓葛羅祿來附

高仙芝本高麗人開元六年從軍安西驍勇善戰累官四鎮節度使小勃律王及其旁二十餘國皆服

趙頤爲安西副都護開元十五年九月庚子吐蕃寇安西趙頤與戰大敗之

蓋嘉運爲北庭都護開元二十四年正月及突騎施戰敗之八月甲寅突騎施請和二十七年八月嘉運敗突騎施於賀邏嶺執其可汗吐火仙

李嗣業京兆高陵人高仙芝討勃律署嗣業及田珍爲左右隊牙將至勃律擒其主平之授右威將軍從仙芝平各國及突騎施以跳盪先鋒加特進虜號爲神通大將

田仁會雍州長安人薛延陀寇河內仁會與執思力率兵擊之尾逐數百里

席元慶高仙芝副將軍也仙芝軍自安西行百餘日至連雲堡遣元慶將千騎前行謂曰小勃律聞大軍至其君臣百姓必走山

谷第手取出繒帛稱敕賜之大臣至盡縛之以待我元慶如其言仙芝至急遣元慶往斫娑夷藤橋斫甫畢而吐蕃救至

張嵩北庭節度使也吐蕃圍小勃律王沒謹忙謹忙求救於嵩嵩遣副使張思禮將蕃漢步騎四千倍道令擊大破之斬獲數萬自是累歲吐蕃不敢犯邊

楊胄顯慶間屯衛大將軍也龜茲王布失畢妻與其相那利通由是君臣猜阻互來告難上兩召之囚那利遣左領軍郎將雷文成送布失畢歸國龜茲大將羯獵拒於途詔胄發兵討之擒斬以徇乃徙安西都護府於龜茲

高侃永徽間邊將也突厥車鼻可汗無狀上命討之侃至阿息山車鼻發諸部兵皆不應遂以數百騎走侃追獲送京師獻於廟及昭陵而赦之自是無邊寇三十餘年

程務挺裴行儉裨將也突厥阿史那伏念自立爲可汗與阿史德溫傳連兵爲寇詔裴行儉曹懷舜禦之軍至涇口多縱反間使

伏念溫傳相猜二伏念以輕騎襲曹懷舜務挺掩金牙山先取其妻子輜重乃引兵北走務挺追之伏念恃遠不設備軍到狼狽遂執溫傳以降裴行儉盡平突厥餘黨以伏念溫傳送京師斬之

元

奇微西域親軍副都指揮使文宗二年十二月以黃金符鐫文曰翊忠徇義迪節同勳賜之以旌其天歷初紅橋戰功

郭寶玉字玉臣華州鄭縣人唐中書令子儀之裔也通天文兵法穆呼哩引見太祖問取中原之策寶玉對曰中原勢大不可忽也西南諸蕃勇悍可用宜先取之藉以圖金帝將伐西蕃患其城多依山險問其攻取之策對曰使其城在天上則不可取如不在天上至則取矣帝壯之甲戌從帝西征收巴實伯里不實南等城次呼展河西人列兩陣迎拒戰方酣寶玉望其衆疾呼曰西陣走矣其兵果走追殺幾盡進兵下塔什干城次阿穆爾

河敵築十餘壘陳船河中俄風濤大起寶玉令發火箭射其船
一時延燒乘勝直前破獲岸兵五萬斬大將繼哩遂屠諸壘收
瑪勒四城辛巳庫奇貢國威錫蘇勒坦汗破奈曼國引兵據哈
什干聞帝至棄城南走入鐵門屯大雪山寶玉追之遂奔印度
時帝駐大雪山前時谷中雪深二丈寶玉請封山川神壬午三
月封崑崙山爲元極王大鹽池爲惠濟王從哲伯蘇布特二先
鋒平諸國有功累遷斷事官卒於賀蘭山

郭德海字大洋寶玉長子也通天文兵法從先鋒哲伯西征渡庫
色勒伯貢海攻鐵山踰雪嶺西北萬里進軍次達哩國悉平之
乙酉還至崢山吐番帥紐掄回紇帥阿必鼎反復破平之戊子
春從元帥庫庫楚游騎入關金人閉關德海斬關而入殺守者
三百人直擣凌風渡塞己丑秋破南山八十三塞陝西平甲午
河南復叛德海往討之斃傷其足以疾歸卒

郭侃字仲和德海之子也幼爲丞相史天澤所器重從天澤屯太

康復以下德功爲千戶從宗王錫里庫西征癸丑至穆錫其國
塹道置毒水中侃破其兵五萬下一百二十八城斬其將呼圖
克岱爾烏珠勒坦蘇勒坦華言王也丙辰至奇塔卜其城在檜
寒山上懸梯上下守以精兵乃築夾城圍之莫能克侃架礮攻
之守將開門降錫里庫遣侃往說烏爾古納蘇勒坦來降其父
阿里據西城侃攻破之走據東城復攻破殺之丁巳正月至烏
喇爾城伏兵下令聞鉦聲則起敵果來伏發盡殺之哈雅蘇勒
坦降西至阿勒鼎破其游兵三萬密藏達爾蘇勒坦降至克實
密爾部呼哩蘇勒坦降西戎大國也地方八千里父子相傳四
十二世勝兵數十萬侃兵至破其兵七萬屠西城又破其東城
東城殿宇皆以沉檀木構成舉火焚之香聞百里得七十二絃
琵琶五尺珊瑚燈檠兩城間有大河有浮樑扼之乃自縛詣軍
門降其將卓克達爾遁去侃追之至暮諸軍欲頓舍不聽又行
十餘里乃止夜暴雨先所欲舍處水深數尺明日獲卓克達爾

斬之又西行三千里至達巴其將周齊致書請降左右以周齊之請爲信易之不爲備侃曰欺敵者亡軍機多詐若中彼計恥莫大焉乃嚴備以待周齊果來邀我師侃與戰大敗之巴爾蘇勒坦降下其城一百八十五又西行四十里至密實斯會日暮已休復驅兵起留數病卒西行十餘里頓軍下令敵不知也潛兵夜來襲殺病卒克納蘇勒坦大驚曰東來天將神人也遂降戊午錫里庫命侃西渡海收布拉克噲以禍福烏都蘇勒坦曰吾昨夢神人乃將軍也卽來降師還西南至實喇斯敵人來拒侃侃直出掠陣一鼓敗之密實肯阿達必蘇勒坦降至布圖侃以奇兵擊大敗之雅雅蘇勒坦降已未破烏林游兵四萬阿必鼎蘇勒坦大懼來降得城一百二十西南至奇勒揚和達瑪鼎蘇勒坦降西域平侃以捷告西域諸國遂盡屬於元焉

拜達勒阿法布子也世祖十一年錫里濟叛命拜達領阿克蘇一千往征之與昂吉爾珠爾戰於雅里復與永和爾戰於圖喇及

鄂勒歡之地皆大敗之十五年春至雅爾之地與策凌軍合戰五月駐兵額哩頁與威喇台溫綽格色等軍合戰大將塔斯布哈樹木爲柵積石爲城以拒大軍拜達勒督勇士先登拔之伯楞奇默色以其功授虎符定遠大將軍

察罕從太祖征西域攻拔布哈爾賽馬爾堪二城回回國主遣將拒守鐵門關兵不得進察罕先驅開道斬其大將餘衆悉降呼圖克仕元爲宿州鎮將分守汧縣從世祖南征年近七十身被數十創戰功最多世祖憫其老不令從征歷官至工部尙書

明

李英西番人洪武中歸附成祖末年中官橋來喜鄧成等使西域追逆賊見殺掠所齎金帛仁宗敕英與士官指揮康春等進討遂率兵西入賊驚走追擊踰崑崙山深入數百里逆賊大敗之彭清榆林人弘治初充右參將分守肅州與巡撫王繼恢復哈密有功雖位偏裨而好謀有勇略尤爲尙書馮文升所器是時哈

密復爲吐魯蕃所據倚清成功言清名著西域旣得楊肅策銳欲搗哈密襲牙木蘭乃發罕東赤斤暨哈密兵令清統之爲前鋒從許進潛往行半月抵其城下攻克之牙木蘭先遁全師而還是役也清功居多遷都指揮使十年總兵官劉甯罷擢清都督僉事代之其冬吐魯蕃歸哈密陝巴且乞通貢西域復定

許進字季升靈寶人成化二年進士遷陝西按察使時吐魯番阿黑麻攻陷哈密執忠順王陝巴去使其將牙木蘭守之馬文升謂哈密非進不可乃薦許進巡撫甘肅洊鎮告諸將曰小醜跳梁謂我不敢深入耳堂堂天朝不敢發一鐵於塞外何以慰遠人乃重犒赤斤罕東及哈密之居苦峪者令出兵助討遣副將彭清以精騎千五百出嘉峪關錢寧與陸閭以二千五百騎繼之越八日諸軍俱會惟罕東兵未至衆欲待之進曰潛師遠襲利在捷速兵已足用不須待也冒雪倍道進掩至哈密城下牙木蘭先遁餘賊守城官軍四面圍攻拔其城賊退保土刺土刺

華言大臺也守者八百人諸軍速攻不下問其俘則皆哈密人爲賊所刦者進乃令勿攻遣使撫諭卽下於是分守要害懷輯罕東諸衛爲拔散吐魯番黨與以孤其勢乃班師

王瓊字德華太原人成化二年進士累遷至右副都御史代王憲督三邊軍務時吐魯番據哈密番人來寇屢爲參將雲昌所敗其引瓦剌寇肅州者又爲遊擊彭濟擊退之乃獻還哈密求通貢瓊奏乞撫納帝從兵部尙書王時中議如瓊請西域復定

吳允誠蒙古人居甘肅塞外塔溝地永樂三年率其部塔五千來歸自是降附日衆邊境日安由允誠始七月往亦集覘敵擒哈刺等二十餘人進都督同知明年出塞敗本雅失里與中官王安追闊脫赤玉把力海獲之封恭順伯

楊翥指揮也馬文升察其熟悉番情召詢方畧翥備陳罕東至哈密道路請調罕東兵爲前鋒漢兵繼之間道兼程掩其不備文升喜令翥與彭清往果克其城

新疆圖志卷一百九

武功二

國朝

查郎阿滿洲廂白旗人雍正八年十月

命往肅州辦理軍需仍兼川陝總督十年七月

諭曰西路軍營事務岳鍾琪辦理總不妥協著卽回京署陝西
總督查郎阿年來辦理軍務事事合宜克勝大將軍之任著署
甯遠大將軍印務但肅州路遠未便來京請訓命大學士鄂爾
泰馳驛前往肅州傳朕訓諭並賞銀一萬兩十一年四月疏劾
駐防度集副將紀成斌駐防烏克克嶺總兵張元佐漫無偵察
致賊刼掠糧車逃遁得

旨紀成斌在軍營正法張元佐降三級調用尋劾總兵曹勳駐
防哈密縱賊捏報奉

旨卽在軍營正法十月奏言副都統阿克山觀音保所管馬倒

斃走失有心玩誤部議卽在軍營正法九月張廣泗奏大敗賊于鄂隆吉爾大坂俘斬甚衆

上命議叙在事將弁

諭曰署大將軍查郎阿雖奉調遣來京然自統兵以來與張廣泗同心協力整飭戎行鼓勵士氣此次克捷亦由平日訓練整頓之所致著一並從優議叙十三年五月噶爾丹策凌乞和查朗阿遵

旨以次撤還大兵六月奏西路駐防事宜得

旨允行又條奏六事廷議如所請行並議再令提督一員駐哈密節制兩鎮居中調度

上從之先是

上軫念從征將弁

勅陝西等省現出各缺十中分三陞補出征之員

諭曰自十一年十二年賊人兩次侵犯卡倫俱爲我兵擒剿未

令免脫且賊人因我軍嚴整畏憚服從前狡獪伎倆不敢復逞此皆查郎阿辦理妥協之故今大兵撤回查郎阿張廣泗俱著交部從優議敘尋議加三級八月

命爲文華殿大學士兼兵部尙書乾隆元年三月奏言巴里坤兵現遵

旨撤還內有勇健一千一百名係新設別無營汛撤回難于部署且係十五省所選伎勇離家日久聚處恐不相宜請各歸本省發督撫提鎮隨標入伍効力不願者聽

上報可五年四月

命還京入閣辦事加太子太保十二年三月因衰病乞休

命以原官致仕九月卒子邁拉遜襲世職

烏爾登滿洲正白旗人乾隆二十一年三月叛賊阿睦爾撒納竄哈薩克定西將軍策楞遣烏爾登以兵一千隨參贊大臣玉保追之追至庫隴癸嶺獲賊黨額琳沁阿睦爾撒納脫走

詔授三等侍衛二十二年六月叛賊扎那噶爾布尼瑪等自額林哈畢爾噶遁哈什河烏爾登偕侍衛瑪常襲擊之擒其黨美諾和什二十三年三月隨副將軍富德擒扎哈部得木齊哈勒拜等五月定邊將軍兆惠招降布魯特沁頭目圖啟拜烏爾登奉檄由珠木罕至圖故斯塔老宣讀

恩旨皆乞降瑪木特呼里比因請遣弟舍爾伯入覲許之烏爾登卽伴送來京二十四年三月擢一等侍衛六月授正藍旗蒙古副都統二十五年凱旋賞幣二十八年遷副軍統領三十年敕送達扎達瓦屬衆至伊犁及由烏里雅蘇臺解送伊犁孳生牛羊俱辦理妥協加一級三十五年卒

新柱滿洲鑲黃旗人姓富察乾隆二十五年

命往葉爾羌辦事二十六年奏言和闐回人所交二十四五等年糧石除官兵支領外照時價糶仍有萬餘石存倉據阿奇木伯克阿什默特等呈稱每年交正項普爾二萬四千騰格每月

復以普爾三千換易新錢故官糧難售若準以綢布牲隻及所屬克勒底雅每年入貢餘金作價願認糶糧石一千八百帕特瑪查回人綢布較糧石頗賤牲隻價雖稍昂仍減於內地辦送金亦通行之物且伊犁布價甚貴若由臺站轉運於兵丁衣服有益得

旨如所請行又言葉爾羌鑄錢一年共得八萬餘騰格阿克蘇又開局鼓鑄與舊普爾參雜行使回人貧富遠近不同不能全收舊錢以足十萬騰格之數查新舊錢參雜自可流通若新錢鑄至十萬騰格時舊錢收盡自得停鑄若舊錢尚有則仍行增鑄以盡收舊錢爲度每月不限定數至錢局所鑄無多工役量減一半以節糜費得

旨新柱辦理妥協著交部議叙是年回京授理藩院尙書三十二年授盛京將軍三十三年卒賜祭葬諡勤肅

三格滿洲正白旗人乾隆二十年六月同都統銜策楞駐巴里坤

辦事二十一年十二月勦呼爾璊台吉賽音伯勒克等游牧于喀拉烏蘇盡收其駝馬

諭部議叙三等輕車都尉世職尋隨大軍赴木壘烏蘭烏蘇科舍圖搜緝叛賊巴雅爾及扎哈沁游牧二十二年三月同侍衛圖倫楚奇微布等由朱爾都斯進勦先是定邊將軍成袞札布檄三格進勦賊那札噶爾布朱成擒九月我兵至博羅和羅遇叛黨額林沁達瓦等百餘戶三格突擊之適布魯古特台吉琿齊呼爾璊台吉達瓦斬扎那噶爾布赴總管端布營詐降並請招額林沁達瓦三格信之遽撤兵還未幾琿齊等遁

勦將軍兆惠勦奏兆惠奏三格受欺狀

命革職以兵丁効力二十三年隨將軍兆惠勦賊霍集占于葉爾羌至黑水被圍偵賊輜重積城南謀由城東渡轉戰往取賊旅拒三格與原任前鋒統領鄂寔侍衛特通額總兵高天喜俱歿于陣事聞

諭曰三格奮勇殺賊盡瘁捐軀深爲憫惻著照依原任副都統從優議卹賜祭葬入祀昭忠祠諡剛勇

鄂倫岱滿洲鑲黃旗人康熙三十一年員外郎馬迪奉

命往諭策妄阿喇布坦抵哈密爲噶爾丹屬所戕

詔各旅兵備調以鄂倫岱領火器營三十五年三月

上親征噶爾丹議派中路兵鄂倫岱統領漢軍鑲黃正白兩旗火器營出古北口九月扈蹕巡北塞領左翼兵三十六年二月遷領侍衛內大臣

樊廷甘肅武威人初名王剛由四川行伍隨征烏蒙及青海西藏俱在事有功歷擢至肅州鎮總兵雍正八年準噶爾賊二萬餘乘我兩路軍營不備犯科舍圖卡倫盜駝馬廷率副將冶大雄等兵二千轉戰無前與總兵張元佐等合擊殺賊無算盡奪還所盜護甯遠大將軍印務提督紀成斌以聞

上以廷忠勇冠軍頗得勝算率領兵弁以寡敵衆爲軍功首賞

銀萬兩給一等輕車都尉世職九年擢陝西固原提督兼都督僉事十年五月陞見求効力軍營

上如所請七月

命隨署甯遠大將軍查郎阿出口十一年領兵駐南山十二年西路副將軍張廣泗偵賊伏烏爾圖水檄廷率兵千五百由蘇泉子一路搜剿至哈沁遇賊官兵奪據山梁衝入賊隊屢敗之越噶順抵鄂隆吉大坂斬賊四百餘生擒三十六獲糧馬器械無算捷聞

上以廷及弁兵等俱奮勇直前獲全勝

諭部優叙尋議廷以軍功加銜二等乾隆元年三月查郎阿請于甘涼等處撥兵五千往駐哈密設總統提督一員廷曉暢軍務深悉口外情形可勝其任

上允之十二月疏言烏爾克一卡爲極西第一要隘坐卡弁兵偵洮賴大坂北面之蘆草溝及噶順溝東面之亂山子並烏爾

圖水每夜皆有火光必賊夷詭譎我兵因念烏克爾兵單酌添
精健三百名協助將駝馬移入有險可據牧放再添撥壯丁分
巡二年五月疏言哈密兵丁分領駐馬今奏准于山南煙墩溝
等處牧于各卡皆當添兵防護卽于山北牧廠防兵二千內抽
撥五百分巡俱可有備無虞諸疏入

上嘉覽之三年二月因病乞解任賜參藥遣太醫馳往診視三
月卒于哈密遺疏入

上以廷于疾亟時猶以邊防事宜諄諄切陳朕披覽惻然

命大學士查郎阿經紀其喪歸葬涼州特給帑五千兩尋贈都
督同知賜祭葬如例諡勇毅子經文襲一等輕車都尉官至廣
東右翼總兵

治大雄四川成都人康熙五十八年由行伍從征西藏克裏塘巴
塘擒逆惡番僧五雍正元年拔補左營把總歷官至陝西莊浪
營參將七年加副將銜入巴里坤軍營八年五月署督標中軍

副將十二月準噶爾犯克什圖我崙磯等卡倫大雄偕總兵樊廷以兵二千當賊二萬轉戰七晝夜拔出兩卡倫兵會總兵張元佐等殺賊無算得

旨褒嘉給騎都尉世職乾隆十二年叙平苗功加都督僉事銜十三年隨征金川經畧大學士傅恒奏大雄曾經出兵人尙老成現委任總理營盤甚屬妥協請賞戴花翎允之二月金川酋沙羅莽等乞降撤兵大雄授雲南提督二十年正月署安西提督五月陛見賞其子繼鈞藍翎侍衛令送父回任十六年疏言藏地喀拉烏蘇等與準噶爾連界準夷盜竊滋擾是其故智今藏之北鄙卽我之雄邊防邊自可弭盜嗣後駐藏大臣仍設重兵沿途安台站以資防守得旨藏中照前駐兵矣此奏具見留心十七年奏劾子繼鈞前至常德接家眷中途私借回民銀有玷官箴奉旨革繼鈞侍衛二十年正月署安西提督

馬虎甘肅武威人乾隆二十年大軍勦準噶爾虎赴西路軍營管馬二十一年隨勦叛賊沙克都爾曼濟等二十二年赴闕展二十四年以墾穫較多議叙加一級二十八年賞副將銜領換班兵赴伊犁屯田三十年補慶陽協副將三十七年七月率兵二千赴金川軍營卒于軍賜祭葬如例入祀昭中祠

閻相師甘肅高台人雍正七年由行伍拔把總効力西路軍營乾隆十七年署瓜州營參將二十一年十二月厄魯特降人沙克都爾曼濟謀叛相師隨巴里坤辦事大臣雅爾哈善勦斬賊衆四千餘尋偕副將丑達以兵千赴魯克察克同額敏和卓勦叛回莽阿里克二十二年五月管理吐魯番屯田二十三年三月領綠旗兵隨靖逆將軍雅爾哈善勦回曾霍集占授領隊大臣五月圍庫車城相師力戰被創九月大軍克阿克蘇將軍兆惠留相師駐守隨勦葉爾羌二十四年三月授安西提督六月駐防喀什噶爾九月調甘肅提督十一月兆惠奏令移駐庫車

諭賞烏魯木齊辦理屯田賚銀幣叙功三等二十七年正月以疾請解任是月卒賜祭葬如例諡桓肅

巴祿蒙古鑲黃旗人定北將軍一等誠勇公班第之子乾隆二十一年三月由珠勒都斯會將軍策楞定伊犁五月隨將軍達爾黨阿進兵哈薩克六月偵叛黨阿巴噶斯哈丹匿博羅和里雅山中馳獲之二十二年四月

諭曰現在都統巴祿副都統哈甯阿赴行在面聆指示著仍回軍營授爲參贊大臣協同定邊右副將軍雅爾哈善辦事二十三年正月管理巴里坤臺站三月隨定邊將軍兆惠由博羅布爾噶蘇進伊犁勦捕昂吉岱等賊四月襲擒喀喇沁宰桑恩克圖等于庫隴癸山尋又擒叛賊鄂哲特

上以賊酋哈薩克喇庫察罕未就擒訓飭將軍參贊等六月偕定邊右副將軍車布登扎布等協緝土爾扈特逃賊舍楞至古爾班察譯爾其入俄羅斯乃還尋

命駐和闐辦事五月懇隨大軍進勦允之六月以兵三千餘由巴爾楚克策應兆惠富德兩軍八月同富德等追擊霍集占于伊西洱庫爾淖爾大敗之師旋叙功授雲騎尉世職二十五年遷正藍旗蒙古都統

上以西域既定頒賞論功

命圖形紫光閣

常賚滿州鑲白旗人姓納喇氏議政大臣瑪奇子雍正十年正月準噶爾逼哈密常賚偕都統良敦總兵張存孝率滿漢兵三千二百名前赴無克克嶺備禦三月授內大臣仍留軍營七月隨大將軍岳鍾琪統兵一萬二千移駐木壘九月自木壘移駐巴里坤十一年十月署大將軍查郎阿奏冬雪深積請分別大臣駐劄以慎防守副將軍張廣泗統兵一萬二百五十駐北山常賚統兵九千駐南山十三年閏四月

命統綠旗兵一萬留駐巴里坤提督顏清如尙書馬會伯爲副

嗣準噶爾乞和乾隆元年六月撤巴里坤兵與留駐哈密之提督樊廷總兵米國正管轄還京任內大臣五年九月因疾乞罷長秦漢軍鑲黃旗人浙江提督長春之弟康熙五十四年策妄阿喇布坦擾哈密長秦隨將軍富甯安駐防巴里坤五十六年襲擊策妄阿喇布坦賊衆于烏魯木齊多俘獲還仍駐巴里坤下部議敘雍正三年富甯安以策妄阿喇布坦已歸順奏撤巴里坤等處兵長秦率吐魯番撤回官兵赴肅州汛鎮

克什圖蒙古正白旗人累兵至察哈爾游牧地方總管康熙五十四年補藍翎侍衛時準噶爾台吉策妄阿喇布坦侵哈密大兵將進

命什圖偕原任員外郎保柱分路賫

勅往諭五十五年三月還

上召詢

諭議政大臣等曰策妄阿喇布坦乃巨猾奸詭之人甚屬無恥

以朕之使臣非使臣諭旨係出部文奏請另遣賢臣大員克什圖等出使策妄阿喇布坦處已經數次著仍令前往頒示

諭旨書諭旨時令克什圖面看繕寫此番使臣到策妄阿喇布坦處得其確實情形大兵即可前往四月克什圖復偕保柱使準噶爾擢二等侍衛並

命復雲騎尉世職五十九年五月從靖逆將軍富甯安由烏爾圖進兵至烏蘭烏蘇口偵賊伏伊勒布爾和碩克什圖率輕騎夜襲之賊以我兵掩至登山藏樹石間發火器抵抗克什圖麾兵擊殺三十餘賊擒賊首垂木柏爾十月授副都統六十年六月回人托瑪托克穆等來降

詔偕侍衛阿玉錫領察哈爾兵千餘駐吐魯番納降八月策妄阿喇布坦遣衆來犯克什圖自出擊而令散秩大臣阿喇納尾自後來擊追入林中擒賊甚衆六十一年

命管理吐魯番等處屯田雍正二年奉

旨克什圖年老著都統穆森同轄屯田兵四年還京任散秩大臣

鄂博什滿洲人隨富德往援黑水管至呼爾璜大敗賊衆迎兆惠兵還阿克蘇鄂博什與弩三爲殿賊無敢追

豆斌陝西固原人由行伍拔把總遷千總雍正四年遷肅州鎮標中營守備七年赴西路軍營從征準噶爾乾隆十九年調安西提督

命率甘肅兵赴西路軍營二十年九月駐巴里坤辦事二十一年十二月奏酌派送馬之兵編隊行走

諭獎所辦甚是尋

命巡巴里坤至額琳哈畢爾噶驛路搜剿瑪哈沁二十三年大軍勦霍集占於庫車十一月斌至軍營充領隊大臣巡緝魯克察克闊展庫車一帶驛路是時將軍兆惠於黑水被圍斌隨副將軍富德自阿克蘇兼程往援二十四年正月抵呼爾璜逆酋

霍集占以衆五千迎拒我軍分兩翼斌領中軍火器攻奪賊所據高崗賊知我馬力乏復擁退越四日阿里袞適至斌偕諸將夾擊脅中銃創甚猶自力拊循士卒奮勇殺賊賊大敗捷聞諭曰此次勦賊自領隊大臣以下人人踴躍自効提督豆斌率中軍鎗砲鼓勇前進奪取賊營脅受創傷著加恩一體議叙并賞給世職復奉

諭曰提督豆斌以負傷身故甚屬可憫著加恩照旗員一品大臣交部議卹給予世職賜祭葬如例諡莊節入昭忠祠予騎都尉又一雲騎尉世職

師懿德甘肅甯夏人康熙五十四年四月策妄阿喇布坦遣賊犯哈密扎薩克達爾漢伯克額敏北境攻掠五寨抵城下懿德檄肅州總兵路振聲領兵先至哈密隨調兵往援奏入

命速往策應尋奏駐防游擊潘之善領兵二百餘敗賊于哈密賊退駐城南二十里外得

旨嘉獎並賞兵丁把總劄付五月奏言臣領兵至西吉水地方賊已遠遁但哈密勢孤無牧處請于距哈密一日程之塔勒納沁有水草處令振聲移駐六月奏言尙書富甯安將軍席柱等奉

命前往甘州與臣等籌議現存馬尙缺二千請以甯夏涼州等鎮標馬協助但營馬不便空懸請領帑買補下部議如所請雍正元年以疾乞休十二年卒

潘之善甘肅靖遠人固原提督育龍之從孫也康熙五十三年領甘州肅州兵駐防哈密五十四年三月策妄阿喇布坦遣賊二千侵哈密之善同筆帖式常保住率兵二百擊敗之甘肅提督師懿德以聞

諭大學士及兵部曰游擊潘之善率領兵丁二百擊敗賊衆二千當此承平日久兵革休息乃倉卒間能如此奮勇直前殊爲可嘉九月遷陝西潼關副將五十六年隨靖逆將軍富甯安擊

準噶爾於烏魯木齊多俘獲五十八年遷湖廣洞庭副將留原任五十九年復擊準噶爾于烏魯木齊有功遷福建延平副將仍留原任雍正元年青海台吉羅卜藏丹叛侵布隆吉爾參將孫繼宗游擊孫超節迎擊遇賊三千餘與之善引兵繼至併力夾擊斬獲無算川陝總督年羹堯以聞

優詔嘉獎四年正月擢四川川北鎮總兵入覲

命叩謁

景陵賜賚甚厚三月調陝西安西鎮總兵尋署四川提督七年以目疾乞休

諭賞銀一千兩五月目疾愈

命署固原提督十一年五月卒

何瑄甘肅甘州人官巴里坤遊擊同治三年各城回變瑄設守具練民團以輔兵力九月逆回馬天保謀煽亂捕殺之戮黨羽千餘人境內肅然四年夏西路賊來犯直逼城南戈戟森如林見

者股慄琯登陴拒守誓爲背城計衆壯之將暮賊營炊煙徧起乃率精騎突出奮擊滿營協領伊勒屯亦以大礮轟賊賊大敗去八月哈密賊萬餘肆擾琯分兵三道迎戰俘斬無算追奔九十里捷聞擢巴里坤總兵五年擊退疊撲巴城逆匪並遣兵復哈密兩城於是賊憚其兵威不敢窺境矣明年再復哈密收賊於五堡卽駐兵其地以杜賊踪

詔嘉其調度有方以提督記名是時全疆淪陷而巴城全糧竭士飢同心敵愾其功蓋不可沒云

長齡字懋亭姓薩爾圖克氏蒙古正白旗人道光五年以文華殿大學士帥伊犁明年六月逆回張格爾叛奉

命爲揚威將軍督兵進勦奏選遣犯二千爲前鋒旌麾所指席捲無前收復南疆西四城擒張格爾於喀爾鐵蓋山回京獻俘錫封二等威勇公繪像紫光閣十年逸犯玉素普入卡滋擾圍喀什噶爾英吉沙爾二城仍

命以揚威將軍往督軍務行抵阿克蘇城圍已解乃奏陳善後事宜並請以西四城閒地招民開墾以供軍糈

上從之先是喀什噶爾參贊札隆阿務劾回邵王伊隆克助逆詔與伊犁將軍會鞠之疏白其誣

殊批曰若非卿二人公忠體國何能平反此獄使內外夷回攝服可嘉之至後晉一等公諡文襄

先正忠諫

楊遇春字時齋四川重慶人由固原提督署甘督道光六年張格爾叛以參贊大臣與將軍長齡參贊武隆阿會兵阿克蘇進剿七年敗賊於洋阿巴特尋敗之沙布都爾又敗之阿瓦巴特擒斬各數萬追至渾水河距喀什噶爾賊巢十餘里賊悉背城自列陣二十餘里築橫壘蔽之會西南風起撼樹揚沙大霧晦我前敵大隊迷途未至將軍以賊據形勢且衆寡不敵欲退屯半舍地遇春不可曰天贊我也賊不知我兵多少久不虞我卽渡時不可失乃遣千騎繞趨下游以綴賊而自率大兵驟占上游

據上風礮勢與風沙勢相併若百十萬兵推壓驟至承勢衝入賊陣賊土崩旬日間連復喀什噶爾英吉沙爾葉爾羌三城遣楊芳復于闐回疆平繪像紫光閣授陝甘總督在任討軍實肅官方邊務皆控制得宜封一等昭武侯諡忠武

先正

兆惠字和甫姓吳雅氏滿洲正黃旗人乾隆十四年駐巴里坤辦事二十一年往籌伊犁善後事宜授定邊右副將軍會厄魯特從征宰桑謀變參贊和起被戕兆惠率千五百人東旋擊賊戰於鄂里戰於庫圖齊戰於達勒齊斬馘數千明年正月抵烏魯木齊賊膽集連日數十百戰我軍無不一當百步行冰雪中履屨不完食瘦駝疲馬且盡至特納格不復能衝擊結營自固遂被圍巴里坤辦事大臣雅爾哈善遣兵三千馳援圍乃解兆惠得新兵復往勦巴雅爾部落平之五月進討回部取阿克蘇下烏什留別將經理回人屯種而自進搗葉爾羌賊度孤軍無繼悉衆來攻圍之於黑水糧盡掘得窖米士卒堅壁守賊放鎗鉛

丸悉中大樹上後援軍至內外夾擊賊乃大潰嗚呼惠可謂有卓識卓力者也當其受困於白草荒沙之境糧盡士飢而同心敵愾卒能使賊膽破心寒其功亦偉矣哉

費揚古姓棟鄂氏滿洲正白旗人康熙三十四年噶爾丹至哈密帥師往禦尋竄去授右衛將軍疏言噶爾丹見踞巴顏烏蘭距歸化城二千餘里宜預備士馬芻糧於來年二月進剿三十五年五月公帥左右翼與賊戰於土臘河賊衆崩潰承夜追奔三十餘里噶爾丹以數十騎遁駐守科圖三十六年正月阿南達奏報哈密回人擒獻噶爾丹之子塞卜騰巴珠等時噶爾丹窮蹙甚左右親信台吉皆面懟聞大兵將至先後望風款附其兄子策妄那布坦復擁勁兵伏阿爾泰山將擒以獻功噶爾丹進退無地每夕或數驚遂仰藥死厄魯部衆降者相繼其下丹濟拉以其屍及其子女來獻中途爲策妄那布坦所奪而獻諸朝所部悉降於是自阿爾泰山以東皆隸版圖拓喀爾喀以西千

餘里朔漠平

劉蔭樞字相斗一字喬南陝西韓城人也康熙十五年進士四十七年擢貴州巡撫四十八年澤旺阿喇蒲坦掠哈密有

旨命公承傳赴軍前周閱詳議公抵巴里坤行視軍營上書數千言請屯兵哈密以逸待勞

命還黔撫任

岳鍾琪字東美號容齋先世湯陰人宋忠武王飛二十一世孫十七世遷蘭州雍正二年正月加奮威將軍出塞抵喀喇烏蘇斬賊千餘尾追一晝夜擒台吉阿喇卜坦溫布等二百餘人追至烏蘭木呼兒擒賊母阿爾太哈賊妹阿寶等羅卜藏丹津衣番婦衣遁追至桑駱海乃班師六年準噶爾不靖

命公爲甯遠大將軍征西路七年五月出師抵巴爾庫爾賊逃八年七月準噶爾傾衆犯北路將軍傅爾丹禦賊失利公督兵襲擊烏魯木齊以分賊勢遂由巴里坤越木壘渡阿察三路擊

賊斬馘甚衆賊敗遁十年二月賊犯哈密遣將擊敗之

潘育龍甘肅靖遠人康熙二十七年遷肅州副將三十五年從征噶爾丹師敗賊於昭莫多四十年擢陝西提督

楊芳字誠村貴州松桃廳人道光六年回曾張格爾反隨陝甘總督楊遇春伊犁將軍長齡征之時賊陷西四城距阿克蘇八十里十月大兵集阿克蘇賊扼柯爾坪地險要中隔戈壁將軍令公襲破之焚其南北莊敗其援師七年二月師至大河拐賊三千來襲營敗之進抵洋阿巴特沙漠平曠賊二萬據橫岡五六里公與將軍參贊分三路進攻賊據岡下壓者再大軍分路奪岡賊披靡擒斬過半盡得牲畜糗糧濟師進抵沙布都爾回城多葦湖樹林賊數萬臨渠列陣決水成沮淤使騎兵不得騁城後林中皆有伏賊難繞襲公先令步卒冒險越渠短兵相接復麾驍騎繞左右橫截入陣賊大潰追逾渾河三十里俘馘萬計復分敗林中伏賊及河橋接應賊越二日賊數萬據阿瓦巴特

回城依岡背河我軍距賊十里止營夜遣吉林勁騎千餘分探左右間道繞出賊後次日壓賊壘而軍賊佯退誘我兵登岡而反乘之我軍鎗礮迭前藤牌兵虎衣躍入賊馬驚陣亂岡後伏賊起殊死戰而我千騎已繞出回堡後突擊其背賊大敗奔撈斬各半殪安集延二酋目追至洋達瑪河距喀什噶爾城八十里次日整隊至渾河北岸賊悉其衆十餘萬背城一戰阻河爲陣互二十餘里築壘橫蔽之穴壘轟礮鼓角震天勢張甚公遣死士數百夜擾其營譙罵達旦是夜西南風起撼木揚沙大霧晦將軍以賊據形勢且衆寡不敵欲退十餘里須霽而進楊公持不可公意與楊公合乃遣索倫千騎繞趨下游分賊勢公與楊公率親軍驟渡上游據上風礮勢與風沙勢相搏賊陣亂比曉我兵盡渡風止霧霽乘勢衝入賊陣賊土崩我軍乘勝抵喀什城時三月朔日也張格爾先遁獲其甥姪及僞汗並伯克等斬馘數萬十六日公以兵六千往勦和闐賊破之擒斬逆酋玉努

斯遂復和闐加騎都尉世職時楊公亦連復英吉沙爾葉爾羌二城六月公與將軍參贊帥師八千出塞掩捕楊公屯色勒庫公屯阿賴阿賴者葱嶺之脊脊以西水皆西流乃喀城赴浩罕之道也有浩罕賊三千餘誘官軍入伏鏖戰一晝夜衆幾殆公步步爲營嚴陣出險

上召楊公入關以公代爲參贊十二月密遣黑回出卡縱反間言官兵全撤喀城虛諸回翹首以望張逆果率步騎五百欲乘除夕不備潛襲喀城公與長公嚴兵六千以待二十有七日賊潛至旋折回公率兵星夜追至喀爾鐵蓋山擊斬殆盡張逆僅餘三十賊棄騎登山副將胡超都司段永福等擒之八年正月捷聞

詔封公三等果勇侯勒碑大學及喀爾鐵蓋山

富德滿洲人乾隆二十二年以參贊大臣在北路追剿逸賊聞兆惠被圍黑水卽率兵三千冒雪往援至巴爾楚克舒赫德兵三

千餘來會率以過行二十四年正月六日次呼拉瑪遇賊五千騎連戰四日夜九日渡葉爾羌河距黑水管尙三百里賊愈衆不能進軍且被圍適阿里衮以巴里坤兵解馬至合愛隆阿兵千餘夜望火光十餘里知官軍與賊相持處也卽橫張兩翼直捕賊壘奮擊賊昏夜不辨自相格殺潰退我師遂長驅直進未至黑水管數十里又擊敗之兆惠管聞鎗礮聲塵起知援兵至潰圍殺出賊敗入城兩軍退還阿克蘇休息數月至六月富德與兆惠分路進勦霍集占棄葉爾羌遁降其衆四萬餘戶追勦霍集占於阿爾楚克等處大敗之逆酋弟兄竄入巴達克山我軍暨之勒令擒獻十月巴達克山汗素勒坦阿殺二酋而獻其首回疆平

富甯安滿洲鑲藍旗人大學士阿蘭泰之子康熙五十四年四月上以策妄阿喇布坦侵哈密

勅西安將軍席柱甘肅提督師懿德等領兵援勦

命富甯安率侍衛等前往總統調度

諭之曰朕以爾堪信任故命爾前往軍機大事毋遲緩爾至彼有急應調遣之事不必請旨卽與將軍席柱商酌而行時賊兵二千餘逼哈密城駐防哈密遊擊潘之善率綠旗兵二百擊斬賊九十人賊解圍潰走五年富甯安至甘州同席柱奏言吐魯番與哈密接壤係準噶爾咽喉要地當先取之大兵秣馬五旬應齊赴巴里坤從哈密之北大山後烏蘭烏蘇路進兵開展越山取吐魯番相機進剿

詔曰可

上命富甯安至巴里坤擇水草佳處駐兵俟明年前進尋

詔還駐肅州經理糧馬五十五年奏言自嘉峪關運糧至哈密應設十二台用山西陝西小車三千兩每車三人每台分車二百五十兩陸續轉運哈密至巴里坤雖近中有科舍圖嶺間之自哈密至嶺之南設三台令駐哈密兵牽駝運送自嶺北至巴

里坤亦設三台令駐巴里坤兵接運又言哈密所屬布魯爾圖古哩克接壤處並巴里坤都爾博勒津喀喇烏蘇及西吉木達哩圖布隆吉爾附近之上浦下浦皆可開墾以裨軍食又言布隆吉諸處田禾豐收人民漸集請遣官建倉廩及收貯農器房屋並于西吉木設赤金衛達哩圖設靖逆衛西喇郭勒設柳溝衛所分置守備千總同知通判兼管事並下議政大臣如所請行五十六年三月授靖逆將軍駐巴里坤

命同振武將軍傅爾丹副將軍祁里德分界覘賊情形六月富甯安率兵赴烏魯六齊擒回人一百六十有九獲駝馬牛羊無算七月至畢留圖厄魯特兵三百餘尾我兵後我兵還擊擒斬數人餘賊越山遁乃還師五十九年七月進兵烏蘭烏蘇令侍衛哲爾德克什圖阿玉錫等分道襲擒阿克塔斯哨卒餘賊望風竄遁復於伊勒布爾和碩奪賊谷中馬百餘破其所踞山隘獲台吉垂木珀爾斬賊三十餘生擒二十四人別遣散秩大臣

阿喇納等率兵諷降闕展城回人進擊吐魯番降其酋長獲馬
駝甚多十月疏言我兵襲擊賊境大振軍威賊人窮促遣使乞
降不過爲緩兵之計奸詭之性不足深信請乘勝搗賊穴臣所
統巴里坤固原甘肅兵萬有七千請選八千人由額稜哈畢爾
漢路六千人由吐魯番阿勒輝路進各持三月糧應令巡撫綽
奇設置台站先期運米及馬駝至巴里坤草廠豫備進勦疏下
傳爾祁里德會議議入復下九卿詹事科道議如富甯安請
命選傅爾丹軍前三千人並其軍明年四月以烏蘭烏蘇地狹
移兵駐伊勒布爾和碩尋奉

諭暫停進勦時策妄阿喇布坦遷其所屬吐魯番回人而行回
人多不願往中道遁回駐魯克齊木衆萬餘擊敗賊所遣宰桑
和勒博斯額木齊兵推托克托瑪木特爲首赴我軍乞降富甯
安以聞且以屯兵守護糧運維艱入奏

上諭議政大臣曰策妄阿喇布坦既不能移吐魯番回人又不

能護圍準噶爾之人其萬不能敵我兵明矣回人歸降既係吾民其令富甯安派綠旗兵一千察哈爾厄魯特蒙古兵一千赴吐魯番駐劄收撫安插如遇賊衆侵擾速行救援無使失所富甯安乃遣阿喇納率兵二千駐吐魯番收撫回人九月聞賊來犯又遣副都統壯圖穆克登各率兵二千援勦而自率兵四千進駐伊勒布爾和碩調遣策應會阿喇納自吐魯番與賊迎戰屢敗賊衆賊遠遁乃還駐巴里坤六十一年四月疏言嘉峪關外布隆吉爾之西爲古瓜沙敦煌地昔魯建城屯種遺址尙存且濱河土肥若駐兵屯牧設總兵官一人統之可扼黨色爾騰之路六月又請專遣大臣領屯田諸處儲糧事宜又言駐守官兵月糧及進勦大軍裹帶隨運糧若一時並輓費多而人亦不給令巴里坤牧駝悉臚壯又于喀爾喀買駝至八月皆肥以駝運糧甚便乘炎熱草盛時分起領運南路至哈密北路至圖古哩克軍營收貯免使臨事張皇

上並可其奏是冬

世宗憲皇帝御極授武英殿大學士仍駐巴里坤管理軍務三年二月

上以富甯安在軍營久謹慎小心賜勅獎諭並賜帑銀二萬兩四年十一月還京

